

长寿县志

六

長壽縣志
(6)

長壽縣志卷十二

自治

縣參議會
民衆團體

慈善
衛生

三費局
附禁政

公園

紅十字分會

自治之起源在遼清末葉光緒三十三年諭各省試行地方自治宣統二年縣議事會參事會城鎮鄉議董兩會先後成立然其時各省官吏以新政所關不得不辦並未切實施行雖各省諮議局力予扶植效亦微矣茲篇以凡屬地方集賢舉辦之事業列入焉

志自治

縣議事會

縣議事會於前清宣統二年九月成立定制縣屬人口在十萬以下者得選出議員二十人二十萬以上增多二萬則多選議員一人依此遞增開會復互選正副議長各一人更選出參事員若干人成立參事會議會爲代議機關凡應興應革事宜議決交行政官吏執行每年開常會一次會期不得逾四十日參議會爲監督執行之機關常川住會督

促行行政官吏執行議會議決之案且備執行官吏之諮詢民國二年總統袁世凱通令停止五年袁死仍恢復開會六年復奉省令停止十一年四川省長劉湘通令恢復補選足額十六年國民政府成立始下令罷會代以縣黨部十八年公布縣組織法有縣參議會規定三十一年因新縣制既已實施應依法組織縣參議會本縣參議員額爲二十人先由縣提出候選人其數加倍次由省依額審定於七月一日宣布員名

城鎮議會

城會及城董事會於前清宣統二年成立議員董事各若干名翌年各鎮鄉議事會董事會亦先後成立鎮設議事會董事會鄉設議事會鄉董鄉佐視居民人口多寡定議員名額議事會由議員中互選正副議長各一人董事會設總董事一人董事以議員廿分之一爲額鄉設鄉

董鄉佐各一名亦為推行地方自治制度也民國三年一月俱奉令停止二十二年國民政府公布地方自治條例縣參議會外復有市區鎮鄉公民代表大會之規定焉

議員 參事員附

第一期縣參議會議員

彭光遠 議長

舒紹卿 副議長 民國元年補議長

楊重持 被選副議長

李貞科 胡明軒

周召南

周景山

葉會唐

鄧國臣 張森

張壽堂

楊樹輝

任燦生

蒲吉甫 陳光宇

周聖卿

曾揚廷

李介眉

盧漢卿 陳聚五

郭樹聲

第二期縣議事會議員

楊重持 議長

周立鼎 副議長 民國十三年議長 楊重持出任軍職開缺補議長

李貞科 民國十三年副議長

葉會澤

韓肇煜

雷光典

譚羣逸

龔文光 黃子言

余頌三

汪和祥

傅明珊

向芳圃

黃樹森

傅其志

陳光宇

周聖卿

但樹績

張俊一

蒲吉甫

郭樹聲

任燦生

廖瑞光

張森

曾揚廷

周景山

楊樹輝

張壽堂

胡明軒

按本縣議事會名額為二十九人自前清宣統二年開會至民國二
年停止為第一期自民國五年奉令恢復六年復奉令停止為第二
期十一年奉令恢復至十六年停止為第三期至三十一年成立縣

臨時參議會

又按民國元年一月元日曾臨時組織縣議事會議長為殷魯副議
長為周鈞迄第一期縣議事會開會始行停止民國十年復奉令組
織縣善後會議議長為鄧佑副議長為舒興激其開會期間為三閱
月也

縣參事會第一屆參事員 華宗智 向名顯 戴鋈

蒙國楨 楊重持

縣參事會第二屆參事員 傅瓊圃 李伯宣 孔昭欽

蒙國楨 傅伯英

縣臨時議會議員 黃佛八議長 王中美副議長 張名振

譚羣逸 楊重持 孫瑤賓 李俊武 雷堯階

張國祥 汪晴笙 樊福昌 向培閑 黃楚樵

張君達 韓佑文 李敬五 陳亦康 韓進之

向育羣 徐光裕 陳鶴年補向培閑缺

慈善

溝梁溪義渡 創於前清末葉其地為東山運煤要道由傅海瀾集資

置產以歲入利益雇工設渡行人便之至今仍舊

官渡口義渡 其地為龍溪河流匯合大江之處亦為長涪陸路所經

於前清光緒初年由斯地焦姓捐地與河街商帮集資舉辦其辦法與溝梁溪同至

今照舊

河鎮濟生局 由成都將軍崇實之妻某氏經過本邑以灘險水急捐

銀五百兩設紅船救生為之創始嗣經河街商幫捐貲於光緒十五年

開辦置有房屋數處以其歲入之利辦理下列慈善事務一搶救落水

之人二檢撈浮屍及掩埋無主死尸三洪水時期設置東西兩溪義渡

東為三洞溝下流橋頭溪西為至公橋宋公橋迤下來公橋溪

以上三項善舉每年遇有不敷臨時由紳商捐助經辦人陶清澄極為

得力基礎以固民國三十一年商會主席廖雨農復倡議籌集鉅款增

設孤獨園即將成立

按至公橋位於縣治南門外西巖瀑布間宋公橋在其下民國二十

七年大水冲毀兩橋由廖君雨農募貲修復立碑記其事云

又按濟生局舊序略云長邑濱臨大江桃溪之左怪石成樑突出江口百餘丈俗所謂龍舌是也而王家灘距龍舌之上養蠶堆又距王家灘之上洪水汜時巨浪拍天茫無涯涘舟之揚帆而下者或左或右不能預定程途迷於所往立蹈危機蓋其常也前經設立紅船四隻乃積久弊生擁空名而無實濟爰約地方人積欸數百金名曰濟生局有能拯得一人生者獎金若干死者若干其條約也

姚裳邑庠生性慈祥樂善好施精岐黃施醫設姚氏醫學講習所活人甚衆卒年七十五葬之日執紼者千餘人

縣人陳鴻儀

另有傳

性慈仁好濟施民國八年創辦緝熙濟藥處於河街

鎮魚市街旋在南川太平場巴縣豐盛場立緝熙濟藥分處並墊江恆善濟藥分處因感藥材之不使又於重慶西四街成立長春藥房以為

收發之所仍設診所以治疾二十餘年受其惠者稱道弗衰云

吾邑人士於公益慈善事業夙稱見義勇爲樂輸鉅資昔人如戴大有
戴瑄和周國興修城工胡超建渡舟至葛蘭太平至羅圍兩路劉清律
捨縣試院地址劉存仁出貲府試雨棚及縣試院舒藩羅隆光創置賓
興學田項耀鳳建渡舟長生橋舒世煥建松柏龍船橋傅元懋建松柏
街市並捐小學一所經費程銀齋領建雙河霽虹橋殷肇慶羅元之捨
本邑中校清水塘地基近年如孫鴻猷於重慶商業中校本邑中學
女生部圖書鳳山中學健行小學千佛扇陀古佛等鄉中心小學校以
及濟生局佛學社河街補修道路公園球場民衆講演亭黃韻府楊文
周廖雨農等於河街創辦中學校又雨農於河街孤獨園楊其昌韓星
五等於鳳山中學張紹儒於籌辦學校多所資助皆盛舉也其他樂善
好施如復興健行小學暨公共建築臨時振濟等尤指不勝屈後之來

者當觀感而興起矣

三費局 三費局者命盜重案吏役相驗緝捕抬解等費也獄訟爲人
民大累每一案出破產亡身者比比皆是良有司憂之籌貲以恤株累
善政也清光緒十餘年知縣霍潤生設立局有定章並於大堂豎鐵碑
嚴禁差役勒索地點佃新署街民房繼遷鄧家巷鄧宅又遷縣府糧房
民十年併入地方收支所

南城公園 民國十六年范師駐縣闢考棚側面隙地撤石佛寺兩旁
廟宇材料移建亭臺數座鑿池蓄水種植花木此地高山仰止大河前
橫頗饒眼界惟布署欠曲折綠樹無多每當春夏之際蔭濃蔽日賞心
豁目一值晚秋隆冬樹葉黃落卽呈蕭條景象是在有責者隨時補葺
耳羅慎餘有記勒石長壽山城風氣閉塞初無勝地足以壯遊觀闢胸
襟者丙寅春師長范君紹增副師長羅君君彤駐節是邦提議建南城

長壽縣志 卷十二 五
公園命餘督修期年落成朱檻曲折規模粗具至若裨補缺漏益增瓌
璨是所望於後來者

紅十字會

中華民國紅十字總會於民國二十九年三月委託邑人胡明堂等籌
長壽分會基本會員三十人八月正式成立分會推舉殷超倫爲會長
胡明堂戚道宏爲副會長並續募會員三十餘人三十年十一月由總
會派第二衛生防務隊隊長湯又銘率護士隊員六人蒞長爲人民診
療疾病一律免費借用北門內胡家院子爲會所診治內外各科并接
產防疫所有掛號藥品注射等概不取費每日診治約數百餘人隊長
一職現改由周慶禎

民衆團體

本縣民衆團體現在組織成立者如左

縣教育會

縣農會

醬園業公會

縣商會

縣工會

木業公會

糖業公會

熟鐵業公會

國醫學術研究會

花業公會

力伏業公會

捲菸業公會

藥業公會

石工業公會

婦女會

木船業公會

印刷業公會

縫紉業公會

鹽糖門市業公會

爆竹業公會

提裝業公會

油業公會

鹽業公會

轎業公會

雜貨業公會

簾業公會

泥工業公會

榨菜業公會

菸業公會

染布業公會

磚瓦業公會

川紙業公會

熟食業公會

理髮職業公會

米糧公會

煤炭業公會

國醫支館

酒業公會

木工業公會

屠業公會

禁政

民國二十四年蔣委員長兼全國禁煙總監釐訂兩年禁毒六年禁煙計劃通令省縣分別成立禁煙委員會是年秋長壽遵照成立禁煙委員會由縣長甘蕙階選聘委員五人常務者三承省禁委會指導協助縣政府對各種運吸售等禁負監察督促宣傳設計責任二十五年令設縣禁煙所由禁委員督飭辦理嗣又推廣鎮鄉戒煙分所勒令煙民入所戒除至二十九年禁政期滿恐尚有漏戒或戒後復吸情形乃呈准成立煙民調驗所分期調驗又於三十年六月及十二月奉令分別實施全縣第三第四兩次煙民抽查複驗三十一年奉令將煙民調驗所併入縣衛生院辦理

衛生院

民國二十九年奉令成立衛生所三十年二月改設衛生院內分總務
醫務產科防疫婦嬰保健及門診部內科室外科室診斷室掛號處經
費一項三十年度一萬九千二百元三十年奉令改爲丙種衛生院
全年經費二萬一千二百六十元

長壽縣志卷十三

物產 動物 植物 礦物

厚生利用莫重乎土產舉凡三農所生園圃所毓以及翼飛脛走穴蟄淵潛山藏石韞芸芸焉總總焉幾莫可名賦斯皆菁華之氣各以土地所宜供吾人之採取者然非順天時度地利盡人力而食用終不能恆足長民者於董率勸課之方又烏可緩哉 志物產

植物

穀之屬

稻 稻有二種有粘者有不粘者不粘者為粳粳者硬也與軟糯之糯相對而得各種類甚多有貴陽粘紅邊粘烏脚粘白油粘浮面跑百日早三百粒羅漢穀馬尾粘十月黃大葉 一名葉下藏八十早施南早陽塵早大白穀小白穀洋白穀等名粘者為糯性質軟糯食之令人貪眠故名種

類亦多有早糯大糯油糯紅殼糯矮子糯白瓷糯堆子糯紅邊糯芝蔴糯馬尾等名老農云肥田不如換種最注意者莫如選種當全穗黃熟呈黃金色之時候天氣晴明兩三日無雨採先出之穗以桶貯水一斗梗米入鹽百二十兩糯米入鹽百兩待溶解後徐入種五升攪之再三凡浮水上者多不佳宜除去而用其下沉者納袋中緩縛之浸漬清流或池水中約七日至十四日如無清流及池水則桶貯清水投以選種時攪之每日換新水然後布席曝兩三日藏之無溼氣處於播種前常使溼潤則發芽迅速且無遲早之差

梁

曲禮梁曰香其俗呼高粱

說文梁性涼

故謂之梁春月布種秋月收莖高

丈許狀似蘆荻穗大如帚粒大如椒赤黑色有二種粘者可和糯作餌釀酒不粘者作糕煮粥可以濟饑稍可作帚莖可編籬供爨紅黑黃白雜色兼備性甘氣平能益肺胃有利於人者甚溥

玉蜀黍 俗名包穀莖高六七尺葉生於節花著於顛莖腋生包包內
結子纍纍然如貫珠有八列十二列十六列之別色有黃紅白種類甚
多大小早遲不一大概分粘糯二種釀酒磨食均佳吾邑山多田少種
土人家率以代半歲之糧

麥 大麥為牟小麥為來詩曰貽我來牟來牟或作麩麩大麥兩種皆有芒殼可

芽可羹脫其殼為飯與稻等小麥只一種南北所產不同南麥花夜開
北麥花晝開北麥性溫食之益氣添力南麥性熱食之助溼生痰以秋
種以夏熟惟麥得四時之氣兩種之稈均可製草帽選種之法與選稻
同惟小麥較大麥質量稍重故用鹽水宜稍濃耳

黍 禮記黍曰薊合俗名小米說文黍禾屬而粘者也亦曰黃黍黍苗
似蘆高丈餘穗黑色實圓重古人定律累黍以生律度量衡後人取黍
定之終不能準蓋必用上黨秬黍色黑一桴二米乃黍之中者均勻無

大小然上黨亦不常有也又古以箬葉裹成稷謂角黍五月五日人家多製之

稷 俗亦名小米曲禮云稷曰明粢一名稷似黍而小說文稷糜也似黍不粘李時珍本草綱目謂粘者爲黍不粘者爲稷爾雅翼黍大體似稷又詩云彼黍離離彼稷之苗通志謂稷苗似蘆而米可食是黍稷相似皆如蘆李氏謂爲一類二種是也

蕎麥 本草一名蕎麥有甜苦二種甜蕎又名花蕎赤莖綠葉莖高三尺葉形三角花小而白結實有三稜其味甜苦蕎莖青多枝葉花帶綠色結實亦似甜蕎稍尖而稜角不峭其味苦二蕎均年種兩季春種夏收秋種冬收育成之期甚速栽培亦不甚費勞力用以磨麵滑細如粉可作餅餌以濟食用每遇旱年農家多種之乾田以救荒但種苦蕎者不及甜蕎之多

黃豆 廣雅云菽莢角類之總稱黃豆有大小二種莖高一二尺葉圓有尖開小白花成簇亦間有赤綠二色結莢長寸餘可作腐造醬生芽入饌又可榨油牛莊一帶出油以此爲大利源宜種於粘質之土壤或麥隴間化學家考析此豆最富滋養料含蛋百質故所製醬一切百工勞人肢體疲倦者欲補其消耗之質非此不可凡豆莖葉皆可飼家畜充肥料其十月熟者名十月豆

黑豆 黑豆亦有大小二種小者爲雄豆可入藥本草綱目陳藏器曰黑大豆炒食極熱煮食甚寒作或極冷造醬及生芽則平馬食之冷牛食之溫製造不同性亦數變又有棕色者名棕豆

綠豆 本草李時珍曰綠豆以色名舊本作菉者非有數種粒粗而色鮮者爲官綠皮薄粉多粒小而色深者爲油綠皮厚粉少早種者呼爲摘綠可頻摘也遲種者呼爲拔綠一拔而已可作粥磨粉澄濾取粉可

長壽縣志 卷十三 三
作饊餌水浸生芽又可入饌濟世良穀也

缸豆 一名裙帶豆有白紅紫赤斑駁數色莖蔓引一二丈葉爲羽狀
複葉結實成莢長至二尺嫩時采莢醃藏最佳老則收子貯以爲食品
飯豆 古名白豆本草釋名飯豆俗又呼大米豆葉莢實俱似缸豆惟
色純白莢較短硬而微曲蔓延不如缸豆之長熟在秋初粥飯均可拌
食又可作腐

四季豆 年可種兩季故名二季豆俗呼爲四季豆葉似綠豆花白色
自根自稍皆繁衍生莢長二三寸而微曲子鮮紅色亦有白者每莢中
或三五粒外有一種泥鰍豆俗呼洋四季豆莖葉花莢無異惟莢稍直
而色微白耳

刀豆 本草釋名挾劍豆李時珍曰以莢形名也莖蔓生引一二丈花
紫色莢長五六寸扁面劍脊三稜宛然嫩時煮食醬食蜜煎俱美老收

其子熟食尤佳

爬山豆 宜種山坡故名莖蔓生葉柔滑蔓長三四寸實赤莢可麵可粥可煮食吾邑山地多種之

蠶豆 本草釋名胡豆李時珍謂豆莢如老蠶故名王楨農書謂當蠶時始熟故名漢時張騫使西域得胡豆種歸卽指此也有大小二種先百穀而熟隨地皆宜可備歉荒莖葉莢均可作肥料邑多種之

豌豆 一名胡豆又名回紇豆以其種來自回紇國也今則蜀人專呼蠶豆爲胡豆而豌豆名胡豆人反不知有紫花白花二種先諸豆熟炒煮均佳磨粉尤良又有一種豆稍狹而微曲者名稜角豌豆嫩時摘莢和肉煮食味美邑多種之

麻 俗名火麻子有雌雄者爲臬麻者爲苴農家擇其子之有班黑紋者謂之雌麻種之則結子繁爲米穀上品又可取油皮可績布扭繩

其積白而有稜輕虛可爲燭心日本高橋重郎著有癩栽製法

胡麻

俗名脂麻

作芝麻非是

以其種由漢張騫得自大宛故名胡麻實含脂

甚富故又名脂麻有黑白二種陶宏景謂八穀之中惟此良以其不獨爲食用又可製油也李時珍謂取油以白者爲勝服食以黑者爲美

蘇麻

有白紫二種子可榨油亦可服食沙州記云乞胡虜之地不種

五穀惟食蘇子吾邑用子炒熟拌錫糖與脂麻同用

蔬之屬

菘 俗名白菜陸佃埤雅云菘性凌冬不凋有松之操故名菘一種莖圓厚微青一種莖扁薄而白葉吾邑有包頭百蓮花白等名又別種名黃芽菜均稱佳品生熟皆可食乾製醃藏俱宜

蕪菁

俗名青菜有蔓青諸葛青菜等名劉禹錫嘉話錄云諸葛所止

令兵士獨種蔓青至今呼爲諸葛菜吳中又名雪裏青經冬愈佳莖圓

而葉如雞冠者宜煮食其生苞者名繡球菜吾邑商人近用此種製榨菜多至數千纒每纒若干斤運往滬漢出售頗獲厚利

萊蕪 俗名蘿葡六月下種秋採苗冬掘根春末抽苔開小花紫碧色夏初結角如火麻子五月亦可再種俗名熱蘿蕪有圓長二種紅白二色生沙壤者脆而甘生瘠地者堅而辣根葉皆可生可熟可俎可薤可醬可食可醋可糖可臘可飯乃蔬中最有益者先選佳種鋤土務深其地若有瓦礫及草木根便生多歧既播種覆以土且鎮壓之發生後經五六日則去其劣者存壯者三四本施肥料閱二三期再去劣者存優者一二本則根自肥大矣

葫蘿葡 李時珍曰元時自葫地來氣味微似蘿葡故名有紅黃二種俗皆名紅蘿葡六七月下種生苗如嵩莖有白毛辛臭不可食冬月掘根長六七寸大者盈握味甘脆吾邑惟南岸多種之

雲臺 俗名油菜一名雲苔本草綱目亦名油菜李時珍謂此菜易起苔須去其苔則分枝必多故芸苔子富油汁故名油菜淮人謂之苔芥種來羌隴氏胡謂之胡菜春時可採台作蔬夏月收子榨油分高矮二種矮者油較濃婦女澤髮必選此種油屏可飼魚肥田莖葉均可作肥料

薑 說文作疆禦溼之菜也王安石字說能疆禦百邪謂之薑苗如初生嫩蘆而葉稍闊葉係對生亦辛香秋社前後新芽頓長如列指狀謂之子姜采食頗佳秋末冬初則愈老愈辛矣生熟醋醬糟鹽蜜醃俱宜吾邑向由外運至現時闔有種者

菠菜 本草名菠菱一名波斯草唐會要云太宗時尼波羅國獻菠菜菜莖柔中空根赤長數寸故名赤根草八九月種者可備冬食正二月種者可備春蔬但久食令人脚弱以其性甚滑也

莧菜 一名甕菜幹長如蔓中空葉如波菱菜李時珍曰性宜溫地畏霜雪九月藏入土窖中俟來年三四月取出壅以糞土卽節節生芽一本可分蒔一畦

甜菜 一名君達菜俗名牛皮菜葉甚厚故又名厚皮葉四月開小花或黃或白結實如茱萸狀其莖燒汁洗衣極白

莧菜 陸佃碑雅云莧之莖葉皆高大易見故字從見凡六種吾邑惟赤白兩種有柳葉蝴蝶之名至馬齒莧無人種植野生者不佳

窩苣 俗名窩筍李時珍謂自員國來故名葉青白莖折之有白汁粘手剝皮生食味如胡瓜糟食亦良鹽曬壓實尤可經久宜種肥地

筒蒿菜 綠色形如列缺微似白蒿本草一名蓬蒿均取其形色同蒿也二月下種可常食八月下種冬春採食四月起臺高二三尺花色深黃子繁衍成球形最宜肥地

高筍 宜種水田中葉長如菖蒲高數尺根如竹筍有殼數層心如窩
蒞色白而碎燒食最佳宿根次年自生二月分蒔之八月可取食

芹菜 本草名苦蕒一名水英又名楚葵陶宏景曰蕒字俗作芹嫩葉
可作肉食香料芹有水芹旱芹兩種水芹生陂池旱芹生平陸吾邑間
有種者

冬菟菜 本草名冬風菜又名東風菜采言冬者得冬氣也言東者先春
而生也莖高尺許葉圓而厚煮食最美俗名叫馬蹄菜吾縣家家種之
九英菘 俗名大頭采李時珍謂九英根大而味短有二種莖整者名
枇杷菜葉缺者名蝴蝶菜用以醃製可經久致遠

茄 茄音伽陳藏器本草茄一名落蘇莖高二三尺葉大如掌自夏至
秋開紫花五瓣相連黃蕊綠蒂其實有團如括箕者有長四五寸者分
青紫白三種澆糞勤且多則味鮮嫩下種時初見根處孽開納硫磺少

許以泥培之則實多而大味且甘諸茄至老皆黃子可入藥

蔞椒 李時珍謂蔞性辛辣如火蔞人故名一名番椒大者名柿子椒極小者名一嚼椒莖高尺許夏乃花白色五出倒垂如茄花結實青色熟則朱紅奪目吾邑種作常食或醃或擣每飯不離

川椒 一名花椒莖高丈許有刺葉爲羽狀複葉對生春日開小花黃綠色雌雄異株實圓小熟則色赤裂開黑子外現實及莖之皮部皆爲香料氣甚烈以多生於秦嶺故名秦椒種宜肥潤地以灰糞和細土覆之則易生

冬瓜 本草綱目冬瓜經霜後皮白如粉塗其子亦白故又名白瓜正二月種之若十月種者結瓜更較春種肥好李時珍曰冬瓜生苗引蔓葉圓而未尖莖葉皆有刺毛結瓜大者徑尺餘長二三尺其瓢謂之瓜練白虛如絮可以浣衣其肉可燒可煮可蜜其子可入果品瓜土必去

舊壅新益以肥料擇透風之處灌溉得法一瓜可重三四十斤

南瓜 俗名荒瓜李時珍曰南瓜種出南番故名二月下種宜沙沃地苗引蔓可延十餘丈節節有根近地卽著其莖中空其葉狀如葵而大如荷開黃花如喇叭狀結瓜正圓間有長尺許者一莖可結數十顆嫩時皮色或綠或白或斑老則轉黃肉厚味甘其中瓢赤子藏瓢中子晒乾煎食亦香吾邑家家種之大者重十餘斤亦可蜜食

胡瓜 俗名黃瓜李時珍曰張騫使西域得種故名胡瓜其種二月生苗引蔓葉如冬瓜亦有毛花黃色結瓜圓一二寸長五六寸可生食亦可醃藏種宜陽地

絲瓜 本草釋名曰天絲曰天羅又有布瓜蠻瓜等李時珍曰此瓜老則筋絲羅織故有羅絲布等名或云種自南方來故名蠻瓜二月下種生苗牽蔓圃中作棚架插竹竿引之結瓜圓寸許長五六寸綠色皺紋

可烹可醃可蜜老則瓢如絲網可以滌器俗呼爲洗鍋羅種宜背陽而向陰

苦瓜 救荒本草一名錦荔枝一名癩葡萄蔓延草木莖長丈餘開黃花結瓜二三寸或五六寸遍體痲瘰色間青白煮食苦澀饒有清氣亦可醃可蜜

越瓜 俗名冬瓜陳藏器曰瓜生越中又名越瓜有綠白二色皮堅硬而有瓣紋以醬漬之味甚鮮而脆

地瓜 莖蔓生結瓜肥圓大者如巨碗次者亦四五兩與苕芋同類皮淡黃肉白秋季掘而煎食味甘而粹非邑舊產近十年來間有種者

瓠瓜 瓜長數尺或尺許粗如人肘首尾粗細略同秋熟味甘專以供食諸書多名爲瓠一種短頸大腹味苦可用以盛酒水或製爲笙諸書多謂之匏一種上部細長下腹圓大別名懸瓜晉人名爲葫蘆俗名瓠

瘠人家以白酒醪三者雖形味各不同其實皆一物也

甘藷 本草拾遺名甘儲一作薯一名蕃藷俗名紅薯二月下種宜高沙地莖長數尺至丈許剪而栽之三節爲一株相間尺許自四五月至六七月皆可陸續栽種一莖蔓延至數十莖節節生根一畝可收數十担勝穀二十倍有皮白肉紅者有皮紅肉白者貧者以之代糧貯藏之法選佳者晒乾於陰地掘穴納貯其中穴底布糠以麥梗等爲側壁置藁於上覆以土更加藁以防溼氣可經久備荒

山藥 俗名白苕又名脚板苕一名佛手苕根大多歧狀如人手脚故名李時珍曰供饌則家種爲良入藥以野生爲勝蓄種之法宜炕火邊至春大者切爲數片窖之土中亦生

馬鈴薯 俗名洋芋原產於南美之智利國莖高二尺許結實爲塊狀圓形一窩多至數十枚少亦數枚如馬鈴故名農家以之代糧

芋 本草釋名土芝又名罇鴨史記曰岷山之下野有罇鴨注云芋也
一名芋魁芋類雖多苗並相似莖高一二尺葉大如扇有水旱二種水
芋宜田旱芋宜土吾邑種水芋者最多亦可用以代糧

魔芋 本草拾遺名鬼芋又名鬼頭磨漿和石灰少許煮熟成腐與黃
豆同其根蔓延穿土掘不易盡芋一次種後不須再植又磨時或無漿
不成腐以鬼魔名者謂近於邪魔也

薇 一名野豌豆生麥田原隰中莖葉氣味皆似豌豆其葉作蔬入羹
皆美一名巢菜按巢菜有大小二種大者卽薇乃野豌豆之不實者小
者卽元修菜蘇東坡云菜之美者蜀鄉之巢故人巢元修嗜之故名野
生農人無種者

蕨 莖嫩時無葉採取以灰湯煮去涎滑晒乾作蔬味甘滑和肉羹食
甚可口蕨醋拌食亦佳荒年可救饑根紫色皮內有白粉搗爛洗澄取

粉名蕨粉最美亦係野生

菌 地生者名爲菌木生者爲樁一名蕈品類千百宋陳仁玉著菌譜甚詳近人侯官陳彭譯有家長養法謂人工所種者乃無毒天然生者常因梅雨蒸溼毒不可食吾邑無家菌皆野菌然亦往往有佳者晒乾久貯不亞口菜

韭 禮記韭曰豐本本草一名草鐘乳

陳藏器曰鐘乳言其溫補也

葉細長而扁秋日莖

頂開小白花成叢根莖肥白而嫩名韭黃味甚美陸游詩難跖宜菰白豚肩雜韭黃豪貴皆珍之

葱 有二種一名四季葱一名牛角葱高一二尺葉爲平行脈四時可採食地下莖色白俗名葱白又本草釋名名葱並有菜白和事草等名名孔者葉中空有孔故從孔此物諸食皆宜故稱菜白和事云

薺 俗名苦薺

音叫

本草釋名薺子葉狀似韭韭葉中實而扁有劍脊

薤葉中空似細葱而有稜根如小蒜一本數顆相依而生名曰薤頭白
樂天詩酥暖薤白酒又薤體光滑露難貯古人所以歌薤露也邑人多
種之

大蒜 一顆有六七瓣或十餘瓣者亦有獨顆者苗苔根可食醃藏尤
宜選根之大者浸水一晝夜又埋土中一二日則去外皮甚易而後植
之土中則長甚速

小蒜 孫面唐韻云張騫使西域始得大蒜種初時中國只有小蒜蒜
乃五葷之一故許氏說文及本草綱目俱謂之葷菜五葷卽五辛謂辛
臭昏神非齋日所宜也道家以韭薤葱蒜苔胡荽爲五葷佛家以大蒜
小蒜興渠卽阿魏慈葱葛葱爲五葷今人謂肉食爲葷不知齋必變食亦
有珍味調攝之周禮王齋日三舉殺牲盛饌日舉平日一舉齋日三舉
並非茹素葷字從艹與肉無涉

芫荽 本草綱目一名香荽可以香口一名胡荽張騫使西域得種歸故名王楨農書云胡荽於諸蔬中子葉皆可用生熟俱可食邑人間有種者

茴香 一名懷香結子如麥粒輕而細有稜俗呼爲大茴香肉與醬雖臭入少許卽香又有小茴香八角回香兩種俱屬香料果之屬

桃 李時珍曰桃品甚多且早結實然不耐久五年卽老十年卽死以皮甚緊也若四年以刀自樹本豎削其皮至生枝處使脂液出盡則多延數年其花有紅紫白各色之別其實有以色名者如紅桃白桃碧桃胭脂桃等是也有以形名者如方桃扁桃等是也有以時名者如早桃秋桃霜桃等是也並可供食惟山中毛桃質粗味劣不堪入口然其仁多脂可入藥並可多植以備移接吾邑種植或園者以白花桃仙桃爲最多又桃李生蛀以煮猪首汁冷澆之卽免

按內經桃爲肺果

李 羅願爾雅翼李乃木之多子者故字從木子綠葉白花其種近百
且能耐久其實大小不一其味甘酸苦澇各異其色有青綠朱紫黃赤
之殊其形有牛心馬肝柰李杏李離核合核之別吾邑種植成林者以
青翠李黃臘李雞血李為多 按內經李為肝果

杏 種類甚多二月開紅花結實黃而圓者為金杏甘而有沙者為沙

杏黃而帶酸者為梅杏青而帶黃者為金杏吾邑各種均有 按內經杏為心果

栗 栗高數丈葉如箭鏃初夏開花實有苞甚多刺如蝟毛中有硬殼

紫黑色一包含實或單或雙或三或四殼內有膜裏仁淡黃色九月霜

降後乃熟其苞自裂而實墜乃可久藏不壞 望堅緻製器甚美 按內經

栗為腎果

棗 陸佃埤雅云大曰棗小曰棘棘酸棗也棗高故重東棘低故並東

棗高數丈葉作卵形互生花小而黃或白實橢圓形色始青白達成熟

期則轉紅蜜之爲餌乾之爲藥皆宜又產於直隸山東者謂之北棗產於浙江金華者謂之南棗皆稱佳品吾邑間有種者酸棗則爲木材之

一 按內經棗爲脾果

黎俗作梨幹高二三丈葉作卵形端尖夏初開花五瓣色白實爲漿果大

而圓至秋成熟皮有細點以產於直隸之河間山東之萊陽者爲最良李時珍曰上巳無風結實必佳故古語云上巳有風梨有蠹中秋無月蚌無胎吾邑有青皮黃皮兩種貯藏之法盛竹篾隔以蘿蔔可經久

林擒 或以爲卽花紅或以花紅爲林擒之一種本草釋名來禽以此果味甘能來衆禽於林故名又名文林郎唐高宗時紀王李謹得五色林擒以貢帝大悅賜謹爲文林郎人因以爲名幹高丈餘葉橢圓有鋸齒春暮開花五瓣白色有紅暈夏末果熟形圓味甘酸可口其質沙鬆故北方謂之沙果樹易生蟲埋蠶蛾於下或澆以洗魚水可免

柿俗作柿幹高大葉爲卵形端尖夏至時開黃色微黃實圓青綠色徑二

寸許八九月采摘色紅味甘吾邑多生摘置罇中雜以梨一二枚壓好
經十餘日取食味美可口可作柿餅一種爲油柿其油質可塗物西陽
雜俎謂有七絕一多壽二多陰三無鳥巢四無虫蠹五霜葉可玩六佳
實可啖七葉肥大可臨書

石榴 一名安石榴博物志漢張騫使西域得安石國榴種以歸故名
栽植時須安僵石枯骨於根下則繁茂多植之庭院中高丈許葉爲長
橢圓形平滑夏初開花萼赤花瓣深紅實爲球形赤色有黑斑中如蜂
房有黃膜隔之子密成窰形如人齒淡紅色亦有潔白如雪者禦饑療
渴解醒止醉皆宜

橘 一名木奴樹高丈許枝多生刺葉作長卵形端尖葉柄有翼狀小
片四月著小白花五瓣結實至冬成熟形扁圓色或黃或紅皮薄而光

滑易剝味甘微酸吾邑向時種者甚少近二十年來培植成園者或數百株或數千株頗獲厚利

柑 其樹與橘無異但少刺耳實形正圓皮比橘色而稍厚理稍粗不易剝瓢多液甘香沁齒橘可久留柑易腐最畏霜雪不及橘樹之能耐寒也吾邑有皺皮柑廣柑數種培植成林者亦多

橙 本草一名金球陸佃埤雅云橙柚屬可登而盛之故字從登樹高大過橘有刺其大者如碗經霜早熟色黃皮厚香氣馥郁瓢有紅有白嗅之則香食之則甘誠佳果也種劣者味酸苦埋死狗於根下即可改良吾邑間有上種培植成園者亦有數十家獲利頗厚藏橙橘之法裹以松毛拌以綠豆經數月不壞

柚 柚樹與橙無甚差異實亦有酸有甘有小如柑者有大如瓜者甚有圍及尺餘者俗呼香欒味甘者爲貴今廣西容縣之沙田柚最爲著

名吾邑亦間有佳種

佛手柑 樹高丈許葉橢圓鋸齒甚細葉腋有刺春開白花五瓣夏末實熟皮黃如柚形長上端分歧如手指狀俗因呼爲佛手柑清香襲人蜜漬味美

拘櫟 俗名香櫟樹與佛手柑相類置衣笥中經旬有香本草綱目謂卽佛手柑日本田中芳男有用植物圖說分爲兩類

胡桃 一名羌桃俗名核桃博物志謂張騫使西域得種歸故有羌胡二名樹高數丈葉爲奇數羽狀複葉夏初開花成穗下垂淡黃綠色結實如青桃熟後漚爛皮肉始見其核狀堅如鐵捶碎乃得其仁有硬骨間之藏法以布袋盛掛當風處則不膩

枇杷 寇宗奭曰形似琵琶故名羣芳譜秋萌冬花春實夏熟備四時之氣他果無與類者葉爲橢圓形鋸齒甚細互生背有褐色毛甚密冬

月開小白花五瓣夏初實熟大者如雞子小者如龍眼形圓色黃皮有細毛味甘酸皮肉淡黃色者俗稱白沙枇杷尤爲甘美饑年貧家剝皮晒乾磨麵充腹夏日用葉釀露清香沁脾並以露和酒尤妙

櫻桃 李時珍曰其顆如瓔珠故謂之櫻樹不甚高葉橢圓而闊有鉅齒春時開小白花結實如小球一枝數十顆生食外可以蜜漬及和糖作羹尤美但經雨則虫自內生人莫之見食時用水浸良久則虫皆出乃可食

葡萄 名目頗多圓者名草龍珠長者名馬乳葡萄白者名水晶葡萄黑者名紫葡萄日本有百餘種大概分釀酒果子二種蔓生之本植物有卷鬚葉掌狀分裂頗平滑春末葉腋抽花穗簇開小花色黃綠至秋實熟皮紫綠色星編珠聚甘美可食李時珍曰葡萄折藤壓土中最易生長吾邑所產特果子葡萄耳

無花果 本草釋名一名映日果昔人謂其有七利多食不傷人老人小兒尤宜一也乾可供籩實二也六月至霜降採摘不盡三也扦插卽活次年卽樹四也葉可醫痔五也可糖蜜六也隨地可植或鮮或乾可濟饑七也三月發葉大而粗糙三裂或五裂五月無花而實實爲肉果無核熟則紫色軟爛味甘如柿中有蛋白汁之成分可助消化作用

橄欖 梅聖俞集名青果紀事珠名忠果王楨農書名諫果樹高可數丈葉爲奇數羽狀複葉花攢簇成總形實尖長色青核內有三竅中有仁廣東有一種橄欖頗大其核可代木炭之用可生食蜜漬鹽藏亦佳
研核作汁治骨鯁喉痛其效如神

銀杏 一名白果樹高或至十丈葉如鴨掌故又名鴨脚子有缺刻面綠背淡二月開花成簇青白色夜間隨開隨落人罕見之一枝結實百十枚經霜乃熟爛去皮肉取核爲果其核兩端尖三稜爲雄二稜爲雌

其仁嫩時綠色久則黃可食此樹須雄雌同種近能相望乃結實或雌樹臨水或鑿一孔納雄一塊坭封之亦結實陰陽相感之妙如此又銀杏質理堅重製器不裂

木蜜 俗名拐棗詩所謂南山有枸是也幹高三四丈葉圓大如桑拓夏月開花成簇色青白枝頭結實如鷄爪長寸許紐曲開作兩三歧儼若雞之足距嫩時青色經霜乃黃味甘如蜜每開歧盡處結一二小子狀如蔓荊子內有扁核赤色如酸棗仁因名棗實未落時多爲野獸獐子等所食吾邑獵人多於樹下掩取之又此果能解酒毒若以爲柱則屋內之酒皆薄又拐棗子鳴食之卽死此不可解者也

慈姑 一名茨菰植於水田莖高二三尺中空葉如燕尾前尖後歧秋開白花爲圓錐花序地下之球莖形臙圓一莖歲生十二子如慈姑之乳衆子其莖須灰湯熟去皮乃不麻澀又磨汁可製粉霜

落花生 一名地豆一名長生果莖蔓生鋪於地上葉爲羽狀複葉夏秋之交開花色黃如蝶形花後子房入地一二寸結實成莢秋末收之以供食並可榨油現有新種俗呼洋花生結實肥大但米粒多不充味亦稍遜吾邑種者頗多

藕 蓮之地下莖也肥大有節中空如管可生可熟可磨粉婦人產後忌生冷惟藕不忌以能破血也如欲久藏以泥裹之則不壞

芋藦 有地粟烏芋鳧此等名莖高二三尺管狀色綠花穗聚於莖端頗似筆頭地下之塊莖形圓可供食亦可磨粉誤吞銅鐵者食之卽化種宜穀兩日

菱 一名水粟種陂塘中莖端出葉兩角者菱三四角者芡浮於水面柄上具浮囊夏月開花四瓣色白實有兩角三角四角等形故謂之菱角生可剝食老則蒸煑搗米爲飯爲糕爲粥果皆可代糧其莖亦可曝

收和飯以度荒歉

甘蔗 莖高六七尺葉狹而尖長二三尺莖如竹有節中實有三種荻蔗莖細短而節疏但堪生啖亦可煎稀糖竹蔗莖粗而長榨汁爲沙糖鍊沙和牛乳爲乳糖又有赤色者曰岷崙蔗俗名紅甘蔗

紅子 一名救軍糧古有軍糧不足藉此充食者故名山谷道旁多有之高二三尺叢生拳密根最堅深枝間如錐二三月開細白花結實圓扁硃紅色纍纍然如珊瑚有如大豆者有如細豆者大者味極甘細者味極苦澀亦有黃色者八九月熟至冬經霜雪其味尤美荒年家貧及甚熟爭摘之磨以蒸餅作糧戊己編云紅子刺梨二物山原之間婦饁未來午茶不繼則耕牧之糧也途左道旁販夫腸吼行子口乾則中路之糧也吾邑山野間尤多

刺梨 考之本草綱目金櫻子一名刺黎子一名山石一名石榴山雞

頭子叢生郊野中幹有刺四月開小白花夏秋結實亦有刺甚密黃赤
色形似小石榴食之消悶煎汁爲膏色同楂梨古方有金櫻酒採刺黎
蒸之曝乾囊盛浸之酒盜名刺黎酒味甚佳按此金櫻正是刺黎金櫻
當作金罌與石榴雞頭皆以形狀得名今藥肆金櫻非本草所名反以
刺黎爲別一物謬矣

木之屬

松 王安石字說松爲百木之長故字從公其幹纍仞聳直其皮或光
滑或粗厚或裂爲龜甲狀其葉有張牙列瓣二針三針五針之別二三
月抽蕤生花長四五寸結實棕色密齒層疊成球形木材爲用至廣並
可取油種類甚多有赤松黑松白松海松五鬚松等別有一種高一二
尺者名羅漢松可供盆景吾邑西山南岸一帶松樹成林者甚多每年
割取松油數萬斤頗獲厚利

柏 史記柏爲白木之長故字從白其樹聳直其葉堅硬其皮薄其肌膩其花細瑣其實如小鈴霜後四裂中有數子大如麥粒其材可爲樑柱器械棺槨吾邑甚廣惜大者甚少涇縣徐紹基廣種柏樹收子榨油可奪洋油之利夫川柏油膩古稱良材惜無人提倡耳

杉 有赤白二種赤杉實而多油白杉虛而乾燥幹端直高至數丈葉作針形較松爲短花單性至秋結球果大如指頭吾邑森林多有之爲用至廣用他木造屋多生白蠹惟杉與柏可免又有一種名錯節杉作棺槨最宜

桑 落葉喬木因每歲刈取故枝幹低亞葉爲卵形肥大可以飼蠶雌雄花皆爲穗狀狀淡黃綠色實略似棗形謂之椹熟則紫黑味甘可食其材可製什器其皮可造紙有土桑湖桑嘉定桑順慶桑之別吾邑向時種桑者甚衆一家或多至數千株或萬餘株因飼蠶屢經失敗現存

者亦寥寥矣

茶 郭樸云早採爲茶晚採爲茗陸羽云其名有五一茶二檟三設四茗五舛今則通謂之茶係常綠灌木高七八尺秋日開白花實三角形至唐時始焙其葉爲飲料大約春日採芽早採而芽細者有兩前雀舌白毫諸名晚採而芽粗者謂之毛尖或稱老茵茶吾邑東西山均產惜少佳品舊時聘婦多用茶故受聘亦曰受茶或曰定根茶天中記凡種茶樹必下子移植則不生故聘婦亦以茶爲禮卽此意也

桂 范成大云凡木葉心皆一縱理獨桂有兩道如圭爾雅謂之浸者能侵害他木也故呂氏春秋云桂枝之下無雜木有金銀丹三種又有月月桂吾邑人家多於庭前及牆外特種之取其濃陰經冬不凋也采花泡去苦澀汁漬以糖甘香可口

楠 一作柗李時珍曰生於南方黔蜀尤多高者十餘丈大者數人引

手方合抱葉爲長橢圓形經冬不凋花淡綠實紫黑木質堅密芳香紋理細膩近根處年久向陽者結成草木山水之狀吾邑亦有此樹特生無成林者明末清初采辦皇木以楠爲多黔蜀騷然又楠木枝枝相避葉葉相讓故又名交讓木文路公所謂移植虞芮者以此

樟 樟產於黔蜀閩廣等處高五六丈大者十圍葉卵形有葉脈三條質硬有光夏初開花小而淡黃實大如豌豆黃色其材聳直肌理細而錯綜有紋宜於雕刻氣甚芬芳俗呼香樟其葉可熬樟腦吾邑八顆鄉黑林子香樟頗多間有採其葉以熬漕腦提香片者惜未改良推廣產量無多

梧桐 樹端直高至十餘丈皮青無節理細而緊枝甚短葉似油桐而稍大光滑有尖其花細蕊莢長三寸許五片合成老則裂開如箕俗呼桐麻盤子綴於上多者五六少者二三大如胡椒其皮仍縐晚春生葉

早秋卽凋古稱鳳凰非梧桐不棲其樹幹之皮剝取水浸可製爲麻以搓繩索並可取油爾雅謂之櫬因其可爲棺也製器具亦佳吾邑人家園亭多特植以藉濃陰云

罌子桐 實狀似罌故名一名油桐又名虎子桐幹多拳曲枝甚稀葉似梧桐而稍小春開淡紅花或白花至秋實大而圓去殼二層中有白米可榨油殼子燒灰作碱餅可作肥料吾邑種者甚多成林者尙少現時晶山組織一桐業林場已植二萬餘株將來可望發達

楊 舊多與柳合稱爲楊柳詩楊柳依依是也然楊與柳實二物枝短硬而揚起者爲楊枝長弱而低垂者爲柳以此相別木材高數仞皮色外白內黃因名白楊葉圓而闊成鋸齒形面青背白葉柄長微風卽動枝柯柔脆春間開花實成白絮飛散冬間取其皮斧細遍撒土中來年二三月叢生如林嫩葉可以代糧老葉可作酒麵料其材肌理細白性

堅直用以雕刻器皿甚佳

水楊 俗名麻柳本草釋名有青楊蒲柳等名宜植水邊故名水楊柳略似箭簇形葉柄根部有小託葉夏開黃綠色穗狀花其材可製器充薪炭其枝勁韌可爲箭簇吾邑小溪兩岸多有之

柳 高三四丈枝細長下垂取其皮可編什器如筐篋之類余宗本種樹書云順插爲楊倒插爲柳葉狹而長花深綠色成穗狀實熟則絮飛散如雪落池沼中卽化爲萍近有灰楊柳一種自外傳入枝幹葉色俱灰白長成甚速作屋材尤堅

黃楊 俗呼千年矮常綠灌木幹高二尺許葉爲卵形質厚而柔軟不花不實其材甚堅緻可製木梳及印板之屬本草綱目黃楊性難長俗說歲長一寸遇閏則退李時珍曰今試之但不長耳蘇東坡詩云園中草木春無數惟有黃楊厄閏年吾邑人家園亭多栽插之以供盆景

女貞 本草釋名一名貞朮又名蠟樹李時珍曰此木凌冬青翠頗有
貞操故以貞女狀之常綠灌木幹高六七尺葉爲長卵形質厚夏開小
白花實亦橢圓色紫黑如鼠矢近時可以放蠟虫俗人呼爲茶蠟樹立
夏前後取蜡虫裹置枝上半月虫化遂成蠟質采以蒸化而蜡成矣又
木中有名爆蜚蚤亦可養蠟

冬青 一名凍青女貞別種也因其凌冬不凋故以冬青名之常綠亞
喬木高丈許葉作卵端尖質厚有光澤實紅而小如赤小豆亦可於立
夏前後養蠟以上兩種吾邑俱產而放虫者多若能廣植養蠟獲利頗
厚

青杠 邑中產地甚廣皆野生混雜而成林其葉皆可飼蠶其材可爲
燒炭其實皆呼爲櫟橡外殼呼爲橡斗實可磨漿爲腐壳可浸汁染料
按此木別境有專種營利者吾邑第就原植之別攘修除不妄砍伐經

七八年亦可放山一次近來科學發明橡樹之皮可製樹膠用途甚多
槐 木質堅重可作屋材製器具初夏開花如蝶形色白微黃炒過煎
水染物甚鮮實爲長茨中有黑子可入藥並可染皂

椿 椿有香臭兩種香椿易長而多壽莊子大椿八千歲爲春八千歲
爲秋雖寓言亦不無因其木皮肌實而赤嫩葉香鹽醃均宜俗呼春
芽臭椿卽樗樹也葉嗅不可食然可餉山蠶

棟 一名苦棟羅願爾雅翼云棟葉可以練物故謂之棟幹高丈餘葉
爲複葉春月開花色淡紫實橢圓如小鈴生青熟黃俗呼金鈴子可入
藥治病

皂莢 俗名皂角又有烏犀懸刀等名其樹高大葉爲羽狀複葉夏開
黃花如小蝶形亦有白色者結實成莢長扁如刀有三種一種肥而短
如豬牙一種長而肥多脂而粘一種長而瘦薄枯燥不粘均可以用

洗濯衣服其材可供器具及薪炭之用

楮 木高丈餘葉類桑而粗糙花雄雌異株雄花列爲穗狀如桑雌花作球形實如楊梅蜜漬可食亦可入藥皮有斑紋爲製紙之原料故紙號楮先生

穀一作構楮之別種略似楮惟葉深裂而較粗糙花類楮而較大實熟色紅可食亦可入藥皮亦可造紙他志謂楮穀爲一物似誤

棕樹幹似圓柱高丈許葉作掌狀分裂有長柄叢生幹端花小色淡黃有苞包之其皮用途最廣編履製蓑織薦作繩均能耐久每樹歲割十二否則樹死卽不死亦不長也其葉亦中繩索

木子樹 俗名椴子樹其實可榨油作燭卽木油也

燈籠樹 樹最易生處處有之深秋滿樹結莢作三稜形紅色成球中分三房各含一子如小豌豆

傲春樹 春時一葉不生入夏始茂吾邑北真觀有一株他處少見

黃葛 本草拾遺名榕王阮亭居易錄名黃果果特葛之轉音吳省欽黃葛考云幹枝互怪詭百狀葉似桂稍大團欒蔭數畝不拘冬春以某月植每歲必至某月始發芽換葉幹枝皆擁腫不中繩墨根皆蟠露土上若植巖石之側則則似全不藉土以生者莊子所謂不材而壽者也本境峽名黃葛已見於水經注至今此樹尤多殆卽閩粵間榕樹之大者

楓 楓似白楊幹大數抱高插雲漢葉圓而歧分有脂而香二月開花結實大如鴨卵竅穴流百液凝如琥珀狀有香氣八月熟美國取其液以熬糖與甘蔗無異又可燒爲膠香爲本性冷溼誤臥其上中風毒卽拳曲不伸堅硬細膩可爲建築材料

紅豆 幹高丈餘葉爲羽狀復葉花白色或淡紅實成莢子如大豆微

扁色鮮紅亦有半紅半黑者纍纍然如綴珠可爲果釘其木製器尤佳
相傳有人沒於邊其妻思之哭於樹下而卒故又名相思子

合歡樹 本草名合昏又名夜合因其葉至暮卽合故有數名葉如皂

莢極細五月開紅花上有絲茸秋實作莢子極細吾邑山野多有之

楸 楸有二種一種名刺楸其樹甚高大周幹起泡如瘡皮色蒼白斑
點枝梗間多大刺其木溼時碎乾則堅吾邑所有卽此種

檬 狀似槐葉黃色此樹刺如鐵釘傷人至死以爲挺可以禦侮大葉
黑皮結子如豆木理紅色名紅檬皮白起殼葉圓而尖木理白色名曰
白檬二種皆堅理異常邑人用以作舂杵鋤柄最佳又可供薪爨

竹之屬

慈竹 叢生六七月出筍經年成竹枝葉乃茂筍味鮮美俗呼黃筍質
甚柔軟可爲繩蓆亦可造紙利用最廣邑產亦甚多王勃慈竹賦序云

生必向外示不離本修莖巨葉攢根杳柢叢之大者或至百千株焉而榮結踰乎咫尺好事君子植爲階庭之玩竹有雌雄雌者多筍自根上第一節觀之雙枝者爲雄種時宜選之又宜西南根栽向西北隅蓋竹性西南行西南乃嫩根也其東北老根種亦不茂吾邑隨處皆有

斑竹 色青多斑大可盈握有大小二種大者爲用極廣小者名鐵斑竹祇可作釣竿

白甲竹 節粗而色微白吾邑西山最多織蓆編籬造紙均宜

水竹 質小而勁纖簾最佳屑可作香籤稍可爲帚根葉可供炊爨

刺竹 節有芒刺

苦竹 有白紫二種其筍苦謂之諫筍質脆用途少宜作香燭心惟筍

燒食味最美

黑竹 初生青質黑斑及老盡黑小而勁直可作葉菸桿

金竹 形如斑竹而小又名荆竹筍最佳種植成林者可獲厚利
冬竹 高大無甚用惟筍可食

觀音竹 葉細密無高大者青翠可愛用以點綴園林

相思竹 產於黃草峽之相思巖兩兩相對生筍省志府志均載之爲
吾邑特產

花草之屬

梅 有紅白綠萼臺閣數種祇供賞玩結子者少早開者曰十月梅

蠟梅 一名黃梅本非梅類因與梅同時開香又相近色似蜜蠟故名
有磬口荷花瓣枸英三種

蘭 名目甚多紫梗青花爲上青梗青花次之紫梗紫花又次之且有
謂春花爲蘭秋花爲穗者其視紉秋蘭爲佩之說不刺謬乎黃魯直云
一幹一花而香有餘者蘭一幹數花而香不足者蕙一種名零陵香則

長壽縣志 卷十三
真蕙也方莖葉如麻相對生七月中旬開紫花甚香刈之曬以酒芬香更烈

澤蘭 懸根而生花黃白似蘭而細不用土栽取大窠懸見天不見日處澆以冷茶清水卽生俗名吊蘭花

珍珠蘭 一名魚子蘭色葉蓓纍如珠花成穗香甚濃

樹蘭 木本香與蘭等俗名珠蘭

黃葛蘭 亦木本幹如黃葛其種自外來花香似蘭近時園亭多種之

菊 古人菊譜數家名目數百土地不同命名隨意儘有一種而數名者惟攜李屠氏藝菊法最簡要吾邑林莊羅紹先最善養菊有五十餘種花大如碗另有五月開者名五月菊至叢生地下花小色黃者名金錢菊

牡丹 花品以牡丹爲第一芍藥第二故世稱牡丹爲花王歐陽花譜

所載凡三十餘種此花最忌烈風炎日種法簡便而最效者於秋分後用猪大腸盤于缸內以猪糞和細新泥壅根則次年花必盛此花不接不佳接須秋社後重陽前單葉者可接以千葉茄根芍藥根均可又椿樹接者高丈餘可于樓上賞玩一接便活逐年有花薛鳳翔牡丹八書有醫花一法可採用

茉莉 晉書都人婦女簪柰花爲織女帶孝卽此性畏寒宜暖地壅以雞糞灌以燙猪湯或雞鴨毛湯或米泔則開花不絕六月六日以治魚水灌之愈茂

楊梅 葉細而青二月開花甚鮮惜不結子地性異也

瑞香 俗名萬年青有楊梅葉枇杷葉荷葉孳枝之別性畏寒又畏日冬月宜置陽處夏月宜置陰處此花又名麝囊能損他花宜另種

紫荊 本草一名紫珠李時珍曰其木似黃荊而紫故名卽田氏荊也

春開紫花甚細碎而繁花罷葉出至秋子熟圓如紫小珠故又名紫珠
紫薇 以手爪其膚輒動搖故又名怕癢樹五六月始花開謝接續可
至八九月故又名百日紅

木芙蓉 本草一名地芙蓉一名木蓮一名拒霜李時珍曰此花豔如
荷花故有芙蓉及木蓮之名九月霜降始開故又名拒霜

梔子 花名簷蔔實可作染料喜肥宜糞澆然太多又生白蟻一種小
者高不盈尺可供盆景

山茶 李時珍曰其葉類茗又可作飲故得茶名經冬不凋惟喜陰燥
不宜肥地

芍藥 世稱花相羅願爾雅翼制食之毒莫良于芍故得藥名鄭風云
伊其相謔贈之以芍藥韓詩外傳云芍藥離草也董子云芍藥一名將
離以之贈別又名婪尾脊名目數十種八九月間出其根滌以甘泉搗

其老之朽敗處揉調豬糞和泥易以新土卽繁茂

繡球花 花小四瓣復由多數小花攢簇成團周徑三寸許始作青紅色既現深紅如球形故名

杜鵑花 俗名豔山紅于杜鵑鳴時盛開故名格物論一名石榴又名山躑躅徧山皆花色又紅紫故名豔山紅

海棠 有荷包垂絲鐵脚等名海棠本無香惟肇慶靈羊峽春海棠其香特盛種法核生者數十年方有花以嫩枝附梨而贅之則易茂種肥沃地則色紅接以木瓜則色白若不花取己花之木納于根跗間卽花
花謝結子剪去之來年花盛而無葉又一種名秋海棠

荷花 一名水芙蓉一名蓮花有紅白二種管子曰五沃之土生蓮花栽宜肥土樹藝書中載有缸荷譜以瓷盆養荷香俱優李白詩荷花嬌欲語可謂窮極狀態矣

木槿 本草釋名曰舜曰日及曰籬落草此花朝開暮落故名日及曰
槿曰舜猶僅榮一瞬之義也曰籬落謂可植爲籬陣也其花可食其木
可種可插吾邑田塍間多有之

夾竹桃 葉作箭簇形斷之者白汁夏月開紅花類杜鵑根葉似竹而
不勁栽宜肥土栽者以肥水澆之則茂

鹿葱 本草注萱花卽鹿葱今人遂直以鹿葱爲萱花不知萱葉綠而
尖長鹿葱葉翠綠而團闊萱葉與花同茂鹿葱葉枯死而後花萱一莖
實心而花五六朵遞開鹿葱一莖虛心而花五六朵並開萱六瓣而光
鹿葱七八瓣如繖形

月季 俗名月月紅又名四季花翠蔓紅花本境少霜雪此花一年十
二月月輒一開吳人有月季花譜言變種之法愈變愈多幾與菊花同
雖不結子而婦女月經不調和酒服之甚效

水僊 又名金盞銀臺李時珍曰此物宜卑溼處不可缺水故名水僊

金盞銀臺花之狀也栽於肥壤則花茂瘦地則無花種時忌用鐵器

玉簪 本草名白鶴仙二月生苗葉大如掌六七月抽莖上有細葉中
出花朵十數枚長二三寸本小末大未開時如白玉搔頭形故名玉簪
分種時忌鐵器與水仙同

鷄冠 花形如雄鷄之冠故名有掃帚雞冠以高爲貴有扇面冠以矮
爲貴分紫黃紅白四色紫黃各半者名鴛鴦雞冠花最耐久

雁來紅 本草拾遺一名老少年雁來紅者雁來時紅也老少年者其
葉嫩時青黃至老而紅甚豔也

鳳仙 本草有急性子金鳳花等名俗名指甲花李時珍曰其花頭翹
尾足俱翹然如鳳狀故以鳳名之其子老則迸裂故有指甲急性諸名
此草不生虫蠹蜂蝶蛇虺亦不近其毒可知

指甲 夏月開花香似木犀其種來自西域婦女用以染指甲較鳳仙尤佳有黃白兩種

薔薇 種類甚多吾邑半野薔薇蘭花與薔薇皆有一點露珠在花間此真花露也又一種似薔薇而小一倍十花者爲十姊妹一倍七花者爲七姊妹日本安井眞八郎著有薔薇栽培法

蝴蝶 有金蝴蝶銀蝴蝶二種金色黃銀色白花皆六出儼如蝴蝶狀黃瓣上有赤色細點白瓣上有黃赤細點

含羞草 一名見面羞葉如皂莢細碎對生嫩綠色其梗可六七寸花圍無人時合分自如人偶見之或以手探之葉遂合而不開其梗倒垂如羞見人也

向日葵 常傾朵向日不令照其根故名慈谿陳啓懷考得向日葵用途極廣多種可辟疫子可榨油作乳哺嬰兒尤勝牛乳稽葉燒灰可製

肥皂其稽用化學提煉又能抽絲比於蠶特載之以備考驗

滴滴金 本草綱目名旋覆花西陽雜俎名金錢花以狀名也爾雅名盜庚花庚者金也謂其夏開黃花盜竊金氣也澤邊生者花小瓣單人家栽者花大蕊簇其苗田陳根卽生新苗根由花梢露滴入於土中卽生新根故名滴滴金也

朱藤 本草綱目名紫藤莖長數丈徑可六七寸引蔓作棚氣極清新凡園亭中有葡萄架者多並植朱藤綠陰倍濃相傳植此可免毒虫蘆 初生曰葭未秀曰蘆長成曰葦短小於葦而中空皮厚色青蒼莖也荻也萑也

葛 有野生有家種可爲絺綌子可作粉名葛粉亦可食

棉 棉有二種木棉產於廣東福建可實裯褥而不可彈紡或疑爲禹貢島夷卉服者是也草棉名吉貝本印度產南史作古貝或以爲唐時

長壽縣志 卷十三 二六
或以爲元時入中國現在河南等省普種者是也莖高二三尺葉掌狀
分歧花白結實如桃熟錠錠裂挺露采取之用機繳去其子彈之爲絮
紡之爲紗織之爲布子可榨油滓可糞枯可薪葉可飼牛近因布紗價
昂吾邑種者漸多惜地不宜棉結果繁茂與中州同惟實多不裂花質
不良故亦未能普種

蒲 一名香蒲其嫩根可食詩惟筍及蒲周禮謂之蒲菹今人罕有食
者惟八九月收葉以織簾花中藥屑細若金粉蒲黃可入藥

藍 陸佃埤雅云月令仲春令民毋刈藍以染康成言恐傷長養之氣
也然則刈葉先王有禁制故字從艸從監藍有三種大藍蓼藍菘藍最
佳於夏至前後視葉上破紋方可收割凡五十斤用石灰一石同浸缸
內至次日已變黃色去梗用木爬在缸中四面攪和粉青色變至紫色
然後去水成錠矣日本城內良平編有山藍新說吾邑西山一帶產藍

最富前清時年可售銀一萬數千兩嗣因洋錠充斥土錠無人承買種藍者遂少現因抵制日貨洋錠稀少吾邑種藍者又普徧於西山矣其他各鄉亦間有種者

仙人掌 多于石上貼壁而生如人掌故名按羣芳譜云仙人掌非草非木亦非果蔬無枝無葉並無花土中突發一片與手掌無異膚色青綠光滑可愛掌上生米色細點每年祇發一片種之家中可鎮火災種法取一片切作三四塊植之肥土自生

萬年青 一名千年矮多年生之常綠草經冬不凋故名

寶葉 一名箬又名籟青而淡柔而韌新舊相代四時常青可以作笠及蓬至端午節包米糉尤必用之

燈草 本草綱目一名虎鬚草初秋刈其莖折抽中心白瓢引長若綫用爲燈炷不抽心可織蓆甚爲綿軟吾邑種者頗多外有水燈心草一

種野生祇供藥用

菸草 俗名葉子菸又名淡芭菰此草于明代由呂宋傳入中國北邊寒疾非此不治關外人至以匹馬易菸一觔崇禎末下禁菸之令民間私種者問徒刑尋令犯者斬旋因邊軍病寒無治遂弛禁其葉製捲菸鼻菸絲菸等吾邑家家種之侯官陳壽彭譯有淡芭菰製法其言治雪茄烟亦無難處以菸稈熬濃汁蘸葉上隨蘸隨薰凡六七次擇葉之精嫩者在外粗破者在中中有通烟之道一綫而後緊捲封固銳其頂捲成後切之往有西人在閩戲試製味濃郁可喜今中國每年雪茄烟入口亦一巨欸倘能仿製微特足以塞漏卮並可出口銷售姑記于此以資考證云吾邑家家種之而以葛蘭鄉爲最盛每年約值數萬元

萍 大者名蘋中者名荇葉相似而圓其小者卽水上浮萍也

陽雀花 杜鵑鳴時卽開故名花枝似枸杞葉間有小刺花絕似蠶豆

色黃一葉一花金光成串吾家籬邊有此

七里香 相傳以爲芸香其說不一有草本木本二種吾邑所產者皆草本其香較木本清遠

藥之屬

艾子 一名吳茱萸禮記名毅味辛香八月擣濾取汁入石灰攪成名曰艾油與吳茱萸功用頗同能療水氣

巴豆 本草名巴椒李時珍曰此物出自巴蜀而形如椒豆故名最能瀉人緊小者爲雌有稜及兩頭尖者爲雄雄者峻利雌者稍緩

杜仲 本草綱目一名思仲一名思仙李時珍曰昔有杜仲服此得道因以名之初生嫩葉可食花實苦澀生者治腰膝痛

桑寄生 寓木也李時珍曰此物寓於他木而生故曰寄生松楊楓桃等樹皆有寄生而以桑上爲貴人必折斷其莖出青烟者始真助筋骨

益血脈

枸杞 一名枸繼本二木名此物辣如拘之刺莖如杞之條故兼二名其實除煩益志浸酒最佳其根名地骨根其皮名地骨皮去風熱益精氣

柴胡 柴古作此嫩葉可茹治寒熱邪氣推陳致新

款冬花 百草中惟此不懼霜雪嫩葉可食係草本今人乃以枇杷花代之消渴喘息呼吸

葶麻 子可取油久存不壞用以養印色製肥皂極佳研傅瘡疥並可塗手足心以催生

扁竹 本草綱目名扁蓄一名扁竹而射干之下亦有扁竹之名人遂混扁竹射干爲一按扁竹注云多生道旁卽爾雅之王芻苦平無毒射干注云高二三丈其葉叢生橫鋪一面如鳥翅及扇之狀故又名鳥扇

苦平有毒其主治各不同雖李時珍亦云射干卽今之扁竹時珍斬陽人彼所謂扁竹未必卽吾邑之扁竹本草釋名異物同名者多不可不慎也扁竹可罨醬羹汁飲小兒療虻虫尤驗

半夏

禮記月令五月半夏生蓋夏之半也消痰下肺氣

土茯苓

李時珍曰按陶宏景注土茯苓亦名禹餘糧昔禹行山乏食

采此充糧而棄其餘故名食之當穀不饑外有仙餘糧冷飯團等名亦其遺意也有赤白二種白者良固中止瀉

瓜萑

一名果羸詩果羸之實瓜萑卽果羸之轉音與木同許慎云木

上曰果地上曰羸瓜萑蔓生附木故得兼名其根作粉潔白如雪卽天花粉治咳嗽滌痰結

遠志

本草亦名小草爾雅名要繞能除邪氣利九竅益志慧其根可

以治痰疰甚效

蒼朮 一名山精嫩苗可食根如薑蒼黑色肉白入藥能散風益氣

獨活 一莖直上不為風搖初產於羌中故又名羌活根可入藥能治

風寒酸痛

益母草 本草名充蔚以其充盛密蔚名也其功宜於婦人及明目精

故有益母及益明之稱

仙靈脾 一名淫羊藿生於不聞水聲處者良治陰痿利小便

防風 治風要藥故名又有石防風生山石間采嫩葉作菜辛香而甘

呼為珊瑚菜白居易在翰林時賜防風粥一甌食之口香七日即此

黃精 實如黑豆可食根為管狀如嫩薑均可入藥益中氣除風溼

蒲公英 一名黃花地丁能健胃又婦人乳癰煮汁飲或敷貼之立消

別一種名紫花地丁治一切癰疽疔瘡尤妙

白頭翁 花蕊尖端有毛下垂如白髮老翁故名其莖有風則靜無風

則搖能治熱利下重

山慈姑 根如水慈姑花如燈籠而朱色癰疽一切磨醋傅之效並治
蛇咬傷

石蒜 一名老鴉蒜一名一枝箭生水邊下溼地其葉直生出土四垂
葉狀似蒲而短根形如蒜瓣味甘荒年貧家掘以磨粉用水漂其澀味
數次可代糧敷貼腫毒亦妙

白茅 俗名毛根春花者爲茅秋花者爲菅下五淋止吐衄諸血症
龍膽 根似牛膝味甚苦治喉痛去目中黃及睛赤脹腫瘀肉高起痛
不可忍諸症

鬱金 以根和酒令黃如金浸水可作染色並可入藥治血氣心腹痛
諸症古時以之浸酒祭祀用之謂之鬱鬯

香附 本草名莎草其根相附連續而生可以合香故名采取其根煨

去黑毛曬乾入藥散寒和三焦解六鬱皆宜

香薰 氣香葉柔產吾邑走馬嶺者佳治霍亂吐下散水腫清暑氣

薄荷 莖葉均有特別香氣治風暑要藥又可製薄荷油薄荷腦等

紫蘇 子可榨油燃燈甚明并能柔五金入藥另有白者一種名桂又

名白蘇專用爲香料子亦可榨油除寒熱及治一切冷氣

艾 王安石字說艾可又疾故字從又醫家用以灸沉寒銅疾故又名

醫草以五月五日連莖採取用以入藥止吐血下痢

臭蒿 一名黃花蒿又名茵陳蒿可罨醬入藥治溼熱發黃

青蒿 本草釋名又名香蒿嫩時醃醋爲菹自然香治瘧疾寒熱

夏枯草 本草名鐵色草朱震亨曰此草夏至後卽枯蓋純陽之氣得

陰則枯故名治寒熱目珠痛至夜更甚者神效

劉寄奴 宋高祖劉裕小字寄奴首得此草故名治金創最效

青香 亦稱野雞與雞冠同類異種治肝明目

續斷 治金創跌打能續筋骨

荔實 一名鐵掃帚其莖勁挺可爲帚故名治皮膚寒熬湯洗之

牛膀子 其子多細刺故一名惡實治風毒腫

蒼耳 一名鼠耳卽詩之卷耳可食謂之常思菜治風氣及燒癢

牛膝 陶宏景曰其莖有節似牛膝故名有紫白二種紫者佳莖紫葉

大者爲雄青細者爲雌以雄爲勝治寒熱

麥門冬 李時珍曰根似麥而有鬚其葉如韭凌冬不凋故謂之麥門

冬又有烏韭愛韭馬韭羊韭禹韭忍冬諸名可以服食斷穀故又有不

死草之稱根肥大者良去熱止煩

燈籠草 一名酸漿治咳嗽風熱明目

苦菜 採嫩者曝蒸作菜食治暴熱火瘡

地膚 一名鴨舌草子落則老莖可爲帚能去皮膚熱氣

王不留行 越年生草莖高一二尺葉形如箭鏃春夏開淡紅花萼爲

筒狀瓣端有凹形子如豆熟則黑此草性走而不住治風毒通血脈

車前草 爾雅云芣苢卽詩之芣苢也又有馬烏牛遺諸名陸機詩疏

云此草好生道旁牛馬跡中故有數名古人有種車前剪苗食能利水

道除溼痺

馬鞭草 本草又名龍牙草鳳頸草蘇恭穗曰類鞭鞘故名馬鞭李時

珍曰龍牙鳳頸皆因穗得名治金創行血和血

蛇含草 含一作銜本草異苑云有田父見一蛇被傷一蛇含一草著

傷痕上經日傷蛇乃去田父乃取草治毒甚驗種之亦令無蛇喉痛者

含之便愈

狗尾草 卽亂苗之莠也狀如狗尾故名又名光明草凡疔目貫髮穿

之卽乾滅赤眼者翻目驗以一二莖蘸水夏去惡血甚良

旱蓮草 柔莖斷之有墨汁故又名墨斗草止血排膿烏髭鬚可作麩

藥

穀精草 產於水田附近係穀田餘氣所生故名一株叢生數十葉秋

日葉間抽莖莖頂由多數鱗片結成小球每鱗片中輒藏一花點點如

亂星故又有流星戴星諸名治頭風目盲翳膜痘後生翳鼻血不止用

草爲末熟麵湯服二錢

見腫消 一名土三七消癰毒患狗咬搗葉貼之

使君子 治小兒五疳殺疔虫

牽牛子 黑白二種治水腫除風毒

土瓜 卽月令之王瓜橢圓而長味甘如薯蕷可食又名公公鬚與地

黃苗名婆婆奶可稱絕對治面瘡利大小便

何首烏 本草綱目云此藥本名交藤唐時有人服之年至百三十而頭髮猶黑因名何首烏李翱有何首烏傳以人名爲藥名也有赤白二種赤者雄白者雌治一切宿疾爲滋補良藥

通草 卽木通也除脾胃寒熱通九竅血脈

鈎藤 葉腋有曲鈎藉以攀緣他物治小兒寒熱驚癇以紅色者爲良
排風藤 治風熱丹毒目赤頭眩

金銀花 本草綱目名忍冬釋名又稱爲鴛鴦藤陶宏景曰藤凌冬不凋故名忍冬李時珍曰其花長垂鬚黃白相半故有金銀鴛鴦等名
治熱毒血痢水痢等症

石菖蒲 一名堯韭典術云堯時天降精於庭爲韭感百陰之氣爲菖蒲故又名堯韭此物生泥水中者不佳有九節生石上者佳葉有劍脊瘦根密節高尺餘者石菖蒲也入藥以此爲良治心腹冷氣痛常嚼昌

蒲飲食永無腹痛之患古詩有九節菖蒲石上仙之句

骨碎補 隱花植物根莖細長延繞於樹上或岩石上一名石毛薑能

破血止血

五加皮 譙周異物志名文章草又名白刺顛治溼毒泡酒尤佳

罌粟 本草釋名一名米囊子一名御米一名象穀俗名鴉片或呼阿芙蓉古人或作穀或作藥品或作花譜原米刺其皮取其漿爲熬膏吸食也又蘇子由罌粟詩有罌小如罌細如粟苗堪春菜實比秋穀研作牛乳烹爲佛粥等云云是此物爲我國舊有並非外洋流入惜數百年來嗜好烟膏者臥床吸食沈淪黑海遂不免指爲毒物列諸禁政罌粟其任咎乎治下痢脫肛遺精久咳等症最爲神效

動物

鳥之屬

鷄 風俗通祝鷄翁善養雞故呼祝祝徐絃云雞稽也謂能稽時也俗
 每以雄雞生卵雌雞叫且為凶兆然人家間有之亦無甚徵驗李時珍
 謂殺之即已吾國善養雞者一年可至四五觔英國女皇曾設宏壯家
 禽社討究飼養法美國胡兒別士著有家雞飼養法日本人譯有家禽
 疾病篇極詳雞之利甚大吾邑養者多未得法

鴨 禽經鴨鳴呶呶自呼其名本草音木鴨李時珍曰鶩通作木鴨性質

木無他禮庶人贊匹匹雙鶩也雌鳴雄瘖俗呼雄者為鴨青人病聲帶
 不足曰鴨青聲氣鴨症曰鴨青瘠肉味美富脂肪卵充食用毛亦可售
 產卵不定其處且好陰溼地通常不自孵卵皆令雞孵之

鵝 李時珍曰鵝鳴自呼江東謂之舒雁似雁而舒遲也古代婚禮用

雁大夫贊雁皆鵝也夜鳴應更能啖蛇及蚓故養鵝以避虫豸又犬咬
 以鵝糞敷之不爛不痛癰疽無頭用新生鵝蛋殼燒灰存性為末醋調

數之立穿產卵不多肉粗硬食難消化而肝爲貴重食品

鴿 張九齡以鴿傳書呼爲飛奴雖遠能自還家有青白皂綠灰斑數色相鶴之法全在眼睛有大小黃綠硃砂數種硃砂者爲最欲睛有硃砂雛時以人之舌常餵其目亦能成硃砂肉與卵俱稱美味

雁 禽經云鴉以水言自南而北鵠以山言自北而南張華注鴉岸並音雁冬則適南集於水干故字從干春則嚮北集於山岸故字從岸狀似鵠有蒼白二種今人以白而小者爲雁大者爲鴻蒼者爲野鵠爾雅謂之鵠鵠南來時瘦北嚮時肥脂味甚美此鳥飛翔有序其飛時或成一字或成人字古詩八月書空雁字斜秋深日落時恆見之

鳧 野鴨也體多脂善沒十餘或數十成羣泛泛于陂塘江浦間俗呼水鴨其同類異形者有撲鴨黃鴨紅鴨扁鴨數種皆可食

雉 漢呂后名雉故諱稱野鷄斑色繡翼雄者文采而尾長雌者文暗

而尾短性好鬪寇宗奭曰雉飛若矢一往而墜故字從矢常宿於坦坡
草中不入深林人逐之則埋頭入草中以爲可免故俗云鑽頭不顧尾
其卵褐色將孵時雌避其雄潛伏之否則雄食其卵肉脂味美

鷹 本草名角鷹又名鷓鷹以鷹擊故謂之鷹項有毛角故曰角鷹
性爽猛故曰鷓鷹少皋氏以鳥名官有鷓鷹氏又大而鷺者曰小雁而
鷺者爲隼嘴利同鈎爪剛如鐵眼尤銳敏盤旋空中無微不至雄者身
小雌者體大善攫人家鷄鴨雞藉以供食

慈烏 本草綱目有孝烏寒鴉等名李時珍曰烏字篆文象形鴉亦作
鴉禽經鴉鳴啞啞故謂此烏初生母哺六十日長則反哺六十日故有
慈孝兩名色純黑鴉甚小羣飛作鴉鴉聲冬月尤甚故謂之寒鴉

烏鴉 本草釋名一名老鴉又名大嘴鴉李時珍曰烏鴉大嘴而性貪
鷺不反哺善避矰繳古有鴉經以占吉凶俗以其聲濁憎之聞其驟鳴

不休方中必有死者然亦不甚驗也

鵲 俗呼鴉鵲本草釋名飛駁馬又名喜鵲又名乾鵲李時珍曰鵲鳴

啾啾故謂之鵲鵲色駁雜故謂之駁為人報喜故謂之喜性最惡淫故

謂之乾大如烏鴉而長尾尖嘴黑爪綠背白腹尾翮黑白駁雜善為巢

開戶背太歲向太乙知來歲風多巢必卑下鄉人藉以占風至秋則毛

毳頭禿

山鵲俗呼山鷓本草釋名曰鷓音學曰音汁其鳴曰行不得也哥哥狀

如鵲色黑白相間有文采赤嘴赤足尾直而長不能遠飛惟櫻桃熟時

多被竊食人多惡之

斑鳩 本草釋名一名錦鳩一名鶉鳩一名祝鳩李時珍曰鶉祝其聲

也斑錦其形也小而灰色及大而斑如梅花點者並不善鳴惟項下斑

如真珠者聲大能鳴雄呼晴雌呼雨性孝而拙於營巢故曰鵲巧鳩拙

鳴鳩 本草釋名一名布穀一名鳩鵲一名獲穀形如斑鳩而帶黃色
牝牡飛鳴以翼拂擊月令鳴鳩拂其羽爲農家候鳥如俗呼阿公阿婆
割麥插禾脫却布袴換工做活之類皆以其聲之相近耳秋收化爲鷦
列子曰鷦之爲鷦鷯之爲布穀布穀久復爲鷦此物變也

鸚鵡 周禮謂之鵠鵠俗呼八哥巢於鵠巢樹穴及人家屋脊中身首
俱黑兩翼下各有白點舌如人舌李時珍曰五月五日取鷦剪去舌端
能效人言又取其目睛和人乳研滴眼中能見雲霄外物吾邑紈袴子
弟多畜之

百舌 俗呼牛屎八形似鸚鵡而氣臭又名反舌月令仲夏反舌無聲
此物能反復如百鳥之音居樹孔窟穴中色灰黑微有斑點啄甚尖行
則頭俯好食蚯蚓立春後鳴轉不已夏至後止鷽一作鶯月令名倉庚爾

雅作商庚一名黃鸝俗呼黃老鴉又名沙和尚詩名黃鳥鳴聲嚶嚶故

名鶯雌雄雙飛體毛黃色羽及尾有黑色相間黑眉尖嘴青脚立春後
卽鳴其音圓滑如織機聲亦候鳥也

燕 本草釋名有乙鳥玄鳥鶯鳥等名李時珍曰乙者其鳴自呼也玄
者其色也鷹鶉食之則死故有鶯鳥之稱春社來秋社去巢於人家梁
棟間諺云燕子不進愁門故燕來營巢人家有歡迎之意

雀 俗呼老而斑者爲麻雀小而黃者爲黃雀領嘴皆黑頭如顰蒜目
有擘椒尾短躍而不步栖宿簷瓦間故又名瓦雀

鷓鴣 俗名黃脰雀本草綱目名巧婦又名女匠鳩性拙鷓性巧故得
諸名卽詩之桃虫也生蒿木之間居藩籬之上壯似黃雀而小灰白色
有斑取茅葦毛毳爲巢至爲精密大如雞卵懸於樹上此謂巢林不過
一枝者也他處市井紈袴有蓄黃脰競鬪出重金賭勝負者曰打飄吾

邑尙無此風

畫眉 狀似黃雀而稍大色蒼黃矯健善鬥兩頰有白毛如眉雄者善鳴其聲悠揚宛轉最動人聽雌則鳴不鬥弄鳥者常飼養之縱其互鬥以賭勝負與黃脰等但人多養雄者古有相畫眉法

杜鵑 俗名陽雀本草釋名一名杜宇李時珍曰蜀人見雀而思杜宇故名以俗傳望帝之魂化此鳥故也其他又有子規鷓鴣催歸諸名皆因其聲似各隨方音呼之狀若鷓而色慘黑口赤頭有小冠春暮卽鳴晝夜不止其聲哀切相傳啼至血出乃止若曰不如歸去鄉俗則但狀其聲曰舉舉陽曰貴貴陽農家每候以興農事

鴛鴦 體小於鴨嘴扁平而短趾有撲杏黃色有文采紅頭翠鬣黑翅尾紅掌頭有白長毛垂之至尾雄鳴曰鴛雌鳴曰鴛交頸而臥人獲其一則相思而死故以喻夫婦之和睦

鷺鷥 禽經鷺飛則霜鷺飛則露命名以此爾雅一名春鋤因此鳥步

於淺水好自低昂有如春如鋤之狀林棲水食羣飛成序潔白如雪頸細而長脚輕善翹高尺餘喙長三寸頂有長毛十數莖翹翹然如絲欲取魚則弭之郭景純云其毛可爲睫羅今人爭獵取以售西人又有似鷺而頭無絲脚黃色名白鶴

鷓鴣 爾雅名鷓一名水老鴉色深黑亦如鴉而長喙微曲善沒洲渚夜巢林木久則糞毒多令木枯漁戶馴畜捕漁

鷓 嘴鈎曲而強羽毛白色長過其尾趾間有蹼常浮水上輕漾如漚形如小白雞能捕食魚介

竹雞 一名泥滑滑一名山菌子一名雞鶻多居竹林褐色多斑性好啼好鬪並好食蟻諺云家有竹鷄啼白蟻化爲泥屋柱生蟻畜此可免秧鷄 如雞而小白頰長嘴短尾背有白斑多居田澤畔夏末入秧林搗秧爲窩育卵孵雛夜啼達旦俗名風簸雀穀黃後不知所往

號寒蟲 夜鳴求旦之鳥夏月毛盛冬月裸體晝夜呼叫一名曷日月
令仲冬曷且不鳴蓋冬至陽生漸暖故也其屎名五靈脂入藥

啄木鳥 俗呼啄木官本草釋名名劉木又名鴛李時珍曰此鳥能裂
樹木喙去蠹虫故名小者如雀大者如鴉有褐有斑褐者雄斑者雌面
如桃花喙足皆青色剛爪利嘴舌端有針刺喙得蟲蠹以舌鈎出食之
又埤雅云鴛善爲禁法能曲爪畫地爲印穴之塞者自開俗傳盜欲退
人家門樓俟啄木飛去故以木塞其穴而布灰於地鳥還卽灰畫符因
以討其法焉

翡翠 爾雅謂之鷁左氏春秋鄭子臧好聚鷁冠俗名翠雀雄爲翡其
色多赤雌爲翠其色多青又大者名翠鳥小者名魚狗以善於水上取
魚故也婦人以其羽爲首飾

獸之屬

豕 許氏說文豕字象毛足而後有尾形牡曰豨曰牙牝曰豨曰豨牡
去勢曰豨人家多畜之家字從豕無豕不成家無家不畜豕邑俗謂牝
而生子曰草豬稚而閹之不令生子曰奶架壯曰牙豬西人不重豬肉
近考其肉富滋養分遂亦啖之蕃殖甚速肉可供食毛可出售骨可作
肥料酒粕豆渣及庖廚餘滓均充食料

牛 牛有犛牛

俗呼黃牛

水牛二種犛牛小而水牛大邑犂水田多用水牛

力大能深犂山田及土多用黃牛不懼陡險肉可食皮革骨角皆有用
而乳尤暢銷西人最講飼養之法分肉用乳用役用三種吾邑惟農家
畜以耕田宜選骨大胸廣脚直蹄堅者乃強健有力

羊 本草釋名一曰羖一曰羝又名羯說文羊字象頭角足尾之形最
供用品者皮與乳也而乳爲第一西人謂羊乳遠勝牛乳人乳吾邑畜
羊者少

馬 許慎云馬武也其字參頭髦尾足之形牡馬曰騶牝馬曰騾去勢
曰名色甚多體大頸長足稍大而輕快者適於乘騎體大頸短足稍
大而堅韌者適於服役西人相馬最精養馬最善而日本人則謂飼馬
不如飼牛三十年前鄉有牧馬自武試罷後而用途更少惟苦力家用
以運物麵房粉房用以旋磨而已

狗 李時珍曰狗叩也吠聲有節如叩物也許氏說文云多毛曰厖長
喙曰獠短喙曰馮種類甚多大約長喙善走者可用爲獵犬短喙善守
者可用爲吠犬邑人好犬雖不如西人之甚然居家守夜必選良種俗
不食狗肉與牛同忌又狗病磨烏藥飲之卽愈

貓 其名自呼陸佃云鼠害苗而貓捕之故字從苗又名鼠將相貓之
法以純黃純黑繩白爲上以身似狸面似虎柔毛利齒口旁有剛鬚數
莖尾長腰短目若金鈴上齧多稜者爲良其睛可以定時正午則圓爲

家所不可少者

兔 魏子才六書精要云兔字篆文象形一云吐而生子故曰兔禮謂之明眎言其不瞬而瞭然也善於營窟故古稱其狡蕃殖速飼養易皮與毛皆有用日本農學士稻田乙丙謂牛羊豚馬之外飼兔亦有益吾邑飼兔者少本係野獸有取而飼于家者遂各爲一種

野豬 狀如家豬但腹小脚長毛色褐有重至二三百斤者其肉最美不臊臭炕臘尤佳惟最害田稼山鄉包穀尤甚

豪豬 俗呼刺豬說文豪豕鬣如筆管者能激毫射人李時珍曰狀如豬而滿身棘鬣長數寸粗如筋其狀似笄白本而黑端吾邑鄉村婦女每以插頭呼爲刺豬簪近深山處亦能害稼

山羊 一名野羊謂羊之在原野也一種角大一種角小吾邑西山往往有之

豹 性暴故名狀似虎而小白面團頭其毛文如錢者曰金錢豹宜爲
裘如艾葉者曰艾葉豹次之最畏蛇吾邑西山間有之

豺 狼屬俗呼豺狗其形似狗前矮後高尾長體瘦毛黃褐色牙如錐
聲似犬氣極臊臭能噬人

狼 俗呼毛狗禽經云狼逐食能倒立先卜所向獸之良者也故字從
良大如狗善捕雞鴨其毛色雜黃黑又有蒼灰者其腸直鳴則後竅皆
沸糞爲狼煙直上冲霄性善顧而貪戾老則其胡如袋所以跋胡蹙尾
進退兩難又狽足前短能知食所在狼足後短負狼而行曰狼狽

狸 本草釋名卽野貓有數種大小如狐毛雜黃黑有斑如貓而圓頭
大尾者爲野貓善竊雞鴨蟲鼠肉嗅不可吃有文如豹而作麝香氣者
爲香狸俗名青綜皮可爲褥尾有黑白錢文相間者爲九節狸皮可爲
裘領有尾似牛面白常登樹食果實者名果子狸味最美省志府志均

載吾邑產此

獺 俗名水毛子本草名水獺四足俱短頭身尾皆扁故俗又名扁子
毛色青黑長三尺許能知水性捕魚甚捷得魚四方陳之進而弗食所
謂祭魚也凡業魚者必馴畜之以捕魚

蝙蝠 俗名簷老鼠本草一名伏翼又有天鼠仙鼠等名其有翼能飛
列入鳥類今科學家以其肉翼獸毛列入獸類形似鼠灰黑色有薄肉
翅連合四足及尾如一晝伏夜飛食蚊蚋能食生育其腦重故倒懸多
生古屋中屎名夜明沙入藥極良抱朴子謂白色者千百歲服令人不
死然唐陳子貞宋劉亮皆得白蝙蝠服之立死好言仙者誤人不少
泥豬 與豪豬同類又名滾豬色灰或黃形似犬而以豬名夏季專食
人家包穀紅苕極狡捷肉不美

鼠 壽最長 俗稱老鼠又稱耗子尖喙善穴灰黑色有四齒而無牙

前爪四後爪五淮南子云魚食巴豆而死鼠食巴豆而肥段成式云鼠食鹽而身輕食砒卽死西人謂鼠能致疫凡瘟疫流行時下令全國掘鼠

鼯鼠 俗名黃鼠狼本草釋名又名鼯鼠狀似鼠而身長尾大黃色帶黝帶赤極騷嗅健於捕鼠常入人家攫鷄鴨但吮其血而棄之又能制蛇蝎其豪與尾可製筆嚴冬用之不屈謂之狼毫

田鼠 俗呼山耗子脚甚短僅能行尾長寸許曰極小最爲禾黍害詩歌碩鼠指此

蟲之屬

蠶 家蠶有一化二化三化四化之別通常飼育者爲一化蠶四季皆可育而春夏育者多吾邑有順慶湖州兩種至山蠶則無人試辦二十年前養家蠶者頗多今亦寥寥矣法國魏雷著有飼育野蠶識略謂已

養過二十餘種地氣不同故難照辦濰縣韓理堂所輯養山蠶法分春
秋二季秋繭更勝于春繭極簡明

蜂 吾邑養蜂者甚少間有之亦不過數桶且未得法日本花房柳條
著有蜜蜂飼養法內外篇英人傳蘭雅譯有西國養蜂法並及野蜂

蠟 李時珍曰唐宋以前澆燭入藥所用白蠟皆蜜蠟也白蠟則自元
以來人始知之其蟲大如蟣虱芒種後延緣樹枝食汁吐涎粘于嫩莖
化爲白脂乃結成蜡狀如凝霜處暑後剝取謂之蜡渣若過白露則粘
住難刮矣將渣煉化濾盡或甑中蒸化瀝下器中待凝成塊卽爲蜡也
其虫嫩時白色可作蜡及老則青黑色乃結苞於樹上初若黍米大入
冬漸長大如雞頭子紫赤色纍纍抱枝宛若樹之結實俗呼爲蜡種亦
曰蜡子皆白卵如細蟻一苞數百次年立春日摘之以箬葉包之分繫
各樹芒種後苞折卵化乃延出葉底復上樹作蜡但樹下要潔淨並恐

蟻食其虫故須時常防護

五倍子 膚木生叢林處者五六月有小虫如蟻食其汁老則遺種作小毯於葉間正如蜡虫之作蜡子也初起甚小漸漸長堅其大如拳或小如菱形狀圓長不等色青綠久則細黃綴於枝葉宛如結實其殼堅脆其中空虛有細虫如蠟蝶霜降前采取蒸殺否則蟲必穿出而殼薄且腐也皮工造爲百藥煎以染皂大爲時用今則西國製熟皮將皮浸於五倍子水內收盡膠質遂變成熟皮比生皮更爲堅韌水難通過亦不腐敗又可造墨水故西人爭購之

螳螂 一名莫緝其子曰螳螂李時珍曰螳螂兩臂如斧當轅不避故又有拒斧之名產卵於桑樹及荆棘間三月中一枝出小螳螂數百枚長成後昂首奮背修頸大腹二手四足善緣而捷以鬚代鼻能翳葉

捕蟬

蛺蝶 大曰蝶小曰蛾其種甚繁皆四翅有粉好嗅花香以鬚代鼻古
今注謂橘蠹化蝶爾雅謂菜蟲化蝶埤雅謂蔬菜化蝶酉陽雜俎謂百
合花化蝶北戶錄謂樹葉化蝶丹青野史謂綵裙化蝶皆各據所見者
而言不知蠹蠋諸蟲至老皆各蛻而爲蝶亦如蛾如蠶之必羽化也

蜻蜓 本草釋名一名蜻虻大頭怒目短頸長腰尾躡翼薄如紗食蚊
虻飲露水羅願曰水蠹化蜻蜓蜻蜓仍交於水上附物散卵復化爲水
蠹也

蚱蜢 卽阜螽呼爲蚱蜢者謂其瘦長善跳而猛也長角修股有青黑
斑數色在草上者曰草螽在土中者曰土螽似草螽而大者曰螽斯數
種皆類蝗而大小不一然均能害稼吾邑農人呼爲蚱蚱音訛爲游
雜母

蟋蟀 一名促織一名莎鷄色光澤如漆有角及翅善跳好鬥善鳴其

性猛其音商立秋後夜鳴幽風七月在野八月在宇九月在戶十月入牀下吾邑小兒畜之竹筒使彼此相鬥以爲戲

蟬 一名蜩謂其音甚調也方首廣額兩翼六足以脅而鳴吸飲風露

頭上有一角如花冠謂之蟬花禮記所謂蟬有綏是也其殼曰蟬蛻入

藥

螢 本草一名夜光一名熠燿並有夜炤宵燭等名體黃頭黑有複眼翅鞘柔軟尾端有發光器呼吸空氣入內光愈美麗

蜘蛛 王安石字說蜘蛛設一面網物觸而後誅之知乎誅之義者故曰蜘蛛種類甚多大小顏色不一皆有毒遺尿著人令人生瘡抽絲布網井然不紊是蟲類之最有智慧者也

蠅 室內之害蟲惟蠅最烈夏出冬蟄喜暖惡寒糞能敗物蓋糞卽細卵蛆由此生蛆又蛻化爲蠅搬運污物傳布惡疾最爲危險不可不防

備也

蟾蜍 爾雅謂之屈秋其皮膚有疣無數疣內分泌白色毒汁犬嚙之口皆腫然取疣中白汁卽爲蟾酥可入藥體肥行遲緩不能鳴常棲息於陰溼之地夜出捕小虫食之俗名癩格寶

蝦蟆 爾雅作驚蟆王安石字說云俗言蝦蟆懷土取置遠處一夕復還其所雖或遐之常暮而返故名蝦蟆常在陂澤中背有黑點身小能跳按百虫解作呬呬聲舉動極急人以爲卽蟾蜍誤矣俗呼闕嘛

蛙 俗名青闕嘛又名田雞蛙好鳴其聲自呬肉味如雞四月食之最美狀似蝦蟆而背青綠色尖嘴細腹以脰鳴亦有背作黃色者名金線蛙

蜈蚣 本草一名卽蛆春出冬蟄節節有足雙鬚歧尾性畏蜘蛛以溺射之斷爛能制蛇見大蛇則緣上噉其頸人或被噬以桑汁和鹽塗之

卽愈

蚯蚓 俗呼曲鱸生於肥沃土中孟夏始出仲冬蟄伏雨則先出晴則夜鳴吾邑人謂曲鱸滾沙必雨屢試屢驗

蟻 蟻有君臣之義故字從義有大小黑白黃赤數種穴居卵生知雨候覓食必整隊而往奮鬥則結陣而行至死不稍却蓋能合羣以保種者

水蛭 俗名馬蝗生水田中柔滑無骨常附農人足脛吸其血有食入腹者爲害甚大惟以田泥或播黃土水飲之數升可下又以牛羊血同豬脂飲之亦可下

木蠹 食木虫也俗名老木蟲節長足短生老木中穿木如錐詩頌如蠹蟻是也

蛻娘 俗名推屎拔本草釋名一名蛻蛻一名推丸莊子云蛻蛻之智

在於轉丸善入糞土中取屎丸而推却之故又名推丸深目高鼻狀如羌胡背負黑甲狀如武士故有蜣螂將軍之名

竈馬 本草綱目名廉本草拾遺一名賊郎狀如促織稍大脚長好穴灶旁俗言灶有馬足食之兆又偷油婆者亦多在食櫃及廚灶間俗謂能解蜈蚣之毒云

地牯牛 體甚小頭有觸角如牛好居古牆灰沙中作漩渦如豆狀物至則攫食之能倒行鄉村小兒多以爲戲玩品

衣魚 卽蠹魚也本草名白魚常藏衣服及書籍中形狀似魚故名相傳蠹魚入道經中食神仙字則體有五色人吞之可致神仙唐張易之之子乃多書神仙字碎剪置瓶中取魚投入糞其蠹食而不能遂心疾書癡可笑古法芸草避蠹今人多用菸草

毛虫 本草名雀甕陳藏器曰毛虫作繭形如甕故名大小如蠶背有

五色斑毛有毒能刺螫人俗以形狀可憎於每年四月八日剪紅紙作十字形書字粘貼壁間以驅之謂之嫁毛蟲

鱗介之屬

鯉 鱗有十字文理故名其脊鱗一道無大小皆三十六鱗每鱗有小黑點產長流淡水中者形味俱美在池沼者有泥土氣

縮魚 似鯉而黑色身圓頭扁骨軟長者尺餘其子滿腹有黃脂邑人呼爲巖鯉

扁魚 扁扁也其身扁故名卽魴魚小頭縮頸穹脊闊腹細鱗其色青白腹內有脂肪味最美

鱧魚 性好羣故曰鱧狀如鱸而頭小扁細鱗肥腹其色最白邑呼爲白甲其大口無鱗者方曰鱧魚誤矣

鱮魚 似鱗而色黑其頭最大此魚中之下品蓋庸常以供饑食者邑

邑呼爲肥頭魚

青薄 似縋而青體薄味美

象鼻魚 鼻長如象蓋有屬也按東山經注云鮪似鱸而鼻長體無鱗

甲

水筩魚 體圓鱗細色白肉嫩味極美宜蒸食惟多刺俗名出水爛

草魚 形長身圓肉厚而鬆以草飼之故名古名鮐有青白二種白者

味較勝

桃花魚 古名厥李時珍曰厥蹶也身不能屈曲如僵蹶然形扁腹闊

口大鱗細與松江之鱸同狀出水數刻卽餒桃花開時始有之故名桃

花

卽魚 本草又名鮒魚陸田埤雅云卽謂其族行以相卽也故謂之卽

以相付也故謂之付形似小鯉色黑而體促肚大而脊隆冬月肉厚子

長江志 卷十三 四十五
多其味尤美邑產無大者

鱖魚 鱖腹黃色故俗名黃鱖生水岸泥窟中似蛇而無鱗多涎沫大者長二三尺或作鱣魚誤矣

鱖 俗名鰕魚體最小長四五寸沈於泥中銳首肉身青黑色以涎自染滑膩雖握物類相感志云燈心煮鱖味甚妙美

石寶魚 產龍溪石縫中長寸許緊粘石上取者警以鞭用網盛之稍緩卽失若拭以手不能得也

閩鰕 產龍溪上游形如鰕而頭尾異味極鮮美藏水底石縫中如閩閩然非鰕沒不能得

鯊魚 俗名吹沙魚小魚也居沙溝中吹沙而游啄沙而食大者長三四寸首尾大小如一黃白色有黑斑點味最美

鼈 俗名團魚水居陸生穹脊連脅與龜同類四緣有肉裙故曰龜甲

裹肉鼈肉裹甲無耳以目聽純雌以蛇爲雄

龜 李時珍曰甲蟲三百六十而龜爲之長外骨內肉廣肩大腰其息以耳壽可千歲無雄與蛇爲牝牡每年秋後收版熬膠者甚衆

蟹 俗名螃蟹傳肱蟹譜云以其橫行名螃蟹狀其鳴聲名郭索以其外骨曰介士以其內空曰無腸公子二螯八足殼上有十二星點如鱗之三十六鱗雄者臍長雌者臍團二螯最美今人尤重食黃腹中之黃應月盈虧生於流水者色黃而腥生於山水者色紺而馨霜降後味美宜於八月取之夜則照火掃之

蝸牛 爾雅一名付贏孫炎注以其負贏殼而行也形似小螺有角如牛行則頭出驚則縮入莊子所謂國於蝸角是也遍體有涎能制蜈蚣又有同類而形伏稍異者二種一曰田螺一曰蝸螺俗統呼螺獅

蛇 種類甚多體爲圓筒形修尾無足以肋骨伸縮而行春出則食物

冬蟄則含土其舌雙其耳聾其毒在涎

守宮 本草釋名一名壁虎一名壁宮色灰黑扁頭長頸四足鉤爪疾走壁上善捕蒼蠅故得諸名

蜥蜴 俗名四脚蛇又名蛇舅母頭扁尾長形小有細鱗生於草澤中又名蛇醫蛇有傷則含草以敷之即愈

蚌蛤 俗名蚌殼其壳兩片爲橢圓形肉體扁厚以鰓呼吸蚌與蛤同類而異形長者通曰蚌圓者通爲蛤故蚌從未蛤從合肉可食壳可製粉

蝦 多鬚善游而好躍產於江湖者大而白產於溪池者小而青梅蝦梅雨時有之蘆蝦相傳蘆葦所化泥蝦乃稻變成多生泥田中

礦物

煤 南岸扇沱鄉現開六洞廢洞九瓦鎮窰對岸石坂沱現開二洞均

不佳亦不旺東出一帶洞較多色黑而黃磷礦甚重難燃燒烟多灰亦多惟大巖屋白沙灣手爬巖三處稍佳現開者三十一洞皆小上城門洞煤較勝却在涪陵界內西山一帶洞亦多質輕成大塊易打碎近八顯場者色深黑光滑如油黃龍寺一帶煤層顯露土人可以隨便掘歸因係項氏公地開采屢起爭端遂封禁晏家場苦竹溝珠寶洞等處黑色而光潤紋如馬尾易燃燒烟少灰亦少火力最猛鍋廠居家者往往不敢用反選其未購之現開者四十八洞頗大

硝 硝有二種一曰洞硝一曰皮硝而洞產尤佳多在巖石中形塊大

小不定吾邑西山產此皮硝產於陰溼老宅地皮內其製法掘硝泥置

大池內

少者可
用木桶

透以清水於大池外低下處築一小池兩池間通以竹筒

使透出之硝質隨水從筒流入小池澄清後舀水入鍋熬之凝爲毛硝取毛硝和桐壳灰蘸調勻再熬舀入布袋濾之承以瓦鉢屢熬屢濾雜

長壽縣志 卷十三
質盡去冷定成磚是爲淨硝吾邑業此者甚多向係官督商銷近歸礦局按時定價然私漏者正不少也

硫磺 性善流通而色黃故曰硫磺最毒烈爲七十二石之將凡火山及溫泉俱作硫磺氣必產此礦又產磺之地其面爲煤煤層之下爲似煤非煤之黑石石層之下卽爲磺礦大小形狀不一捶碎熬煉卽爲磺磺向係官督商銷吾邑東西山及南岸均產煤其中磺礦正復不少近年萬順鄉新開三元磺廠專造硫磺白礬以供軍用

鐵 吾邑西山一帶鐵礦甚富如用西法采煉亦一天然利源也名醫別錄丹砂生符陵山谷中光色如雲母按符陵卽涪陵邑舊屬涪陵古有丹穴寡婦清世擅其利今南岸千佛鄉有懷清臺故址猶存是丹穴在邑境可爲確證又管子云上有丹砂者下有黃金惜無人發明不惟金礦難尋鉄礦亦廢雖地不愛寶而人自棄之深爲可惜吾邑復興鄉

蔣家曹永順鄉老王溝向來均有鐵廠因欵絀暫時停採

按吾邑煤鐵礦三種東山產煤其質量較優者有黃桷岩大堰溝滴水岩三廠西山煤鐵礦均產八顯鄉黃龍市晏家鄉草竹溝一帶產煤極旺質並佳此外尚有九元鉄廠三元礦廠統計煤礦每年產量約在四萬噸左右其存儲量之估計約爲三千六百萬噸鉄礦開採尙少每年產量在二百噸左右其存儲量之估計約爲一百萬噸礦品質較差前曾由三元廠開採年餘產量爲五十噸左右其存儲量正在勦查中南岸煤產現開數洞均不佳亦不旺

長壽縣志卷十四

金石

宋歐陽文忠集錄金石文字後人相沿承襲蒐輯不厭求詳藉以證史傳訛謬資後世考信非好奇異也一邑雖荒巖破寺輒有留遺惟年湮代遠半爲風雨剝剝苔蘚侵蝕蓋金石有時而敝非託諸文字烏能曆久不變乎茲就耳目所及略爲取錄若窮搜潛剔俾吉金貞石供名人品賞豔稱者俟來哲焉志金石

南門石刻

治城南門外大石陰面明萬歷中知縣楊春杖題三巴柱石四字并刻詩以記之詩佚大字尙存半剝蝕

清道光二十六年邑人胡超鐫詩於大石陽面云飛鳳立沙洲溪水兩邊流文武皆一品科甲占鰲頭

長壽縣志 卷十四
民國二十一年縣長閔永濂題諸惡莫作衆善奉行八大字於石上
石內有洞國戰發生後藉以避空襲

石刻佛字

縣南門外天王廟大石上鐫佛字大六尺淳熙二年僧了然書

東門石刻

縣東門外石巖上鐫龍天法海四大字爲邑人羅元字錦堂書

鳳山鏡石

古志云白虎山亦名鳳山山麓石刻讀書處三字旁識云端平二年
鶴山赴召樂溫爲史子書按眉人史大用讀書於此眉州志史大用
一作史用之撰崇德廟碑文純正典雅魏了翁號鶴山嘗知眉州故
與大用相識端平二年蓋召爲同簽樞密院事督江淮軍馬今石刻
已磨滅

西鄉侯碑記

岷山張楚民撰

蜀西鄉侯張翼德祠在涪州樂溫塗暨之南負岡俯江叢木蔚茂舟人往來敬祀羊豕鼓簫管籥日有事於祠內侯沒僅千歲神威凜然未亡至今尤爲衆人敬憚按侯以武力佐先祖得蜀號萬人敵其天資愛敬君子而惡小人余嘗考其人論其世方戰爭破裂智者以詐相傾勇者以力相暴侯於是時以勇聞天下乃獨愛君子其賢於人遠矣使之不戕其身而位廟堂推其好惡之心必能紕逃小人和輯君子而繼孔明之志其或謂侯以武顯而使之輔相人主不亦過乎蓋嘗觀楚漢擾攘之季而高祖定天下曹參戰功居第一及其相齊也能延蓋公師其道德入繼蕭相國卒能以清淨治民號稱賢相况區區蜀國而行侯之志乎甲申歲五月余赴巴陵水方悍激過祠下而禱焉旋以吉卜獻顧欲

長壽縣志 卷十四
爲文以識侯之志未暇也已而若有感焉故序其崖略於祠庶乎識者辨之聖宋崇寧四年乙酉二月二十記

吾邑桓侯祠原在今河街鎮西鄉閣俗稱西街角前臨大江自移城後始遷不語灘岸上石碑湮沒泥沙前清末葉因修街道在泥土中掘出書法遒勁碑橫斷字跡毫未漫漶現存文昌宮

桓侯祠碑記

宋邑令安剛中撰

漢自建安以來王綱廢弛神鼎虛覆奸雄覷釁實生豕心本初孟德之徒磨牙礪吻血視生靈期於吞噬不留遺臭玄德慷慨爲國志在拯援一時豪傑狗義蜂起相與提挈共成大事諸葛關張實爲之最凜冽威風萬夫之雄荊州之役羣盜鼎沸公爲後拒畢力盡死以抗羣醜奮髯張目橫戈一叱蛇豕異類禡魄逃遁虞淵之日復耀西南繫公之功迄

今千歲英靈之氣森聳如在廟食百世在社固宜樂溫之山下瞰大江
公之神爽實茲寓焉自古迄今長載祀典舟行上下與彼士民奔走奉
事罔不虔至九穀嘉生連被原隰船楫往返安流無恙陰相之功在國
與民天朝累封進爵爲王惟是廟宇興建歲久行廊爛頽往來咨嗟力
莫能振郡守李公向者趨朝祇謁祠下再拜祈禱厥應如響至郡未幾
首議修繕自捐金帛衆趨成之功費雖多了不病民撤去卑陋增飾輪
奐開展地基比舊加倍是役也始於庚午之冬落成於辛未之春云

宋高宗藉田手詔碑

佚

在仁和舊城隍祠

青烟洞刻石

洞距縣東十五里在龍溪下遊石崖峭削怒濤直下半壁有潤澤侯

三字

涪陵學宮碑亭記

元賈元撰

碑亭之建臣子所以奉揚國家至美勒之金石以示無窮至正癸巳夏四月涪郡守臣僧嘉閻新建碑亭成教官張安具其事之本末俾元爲文以紀之蓋知天之至者必崇天而極其至知聖人之至者必崇聖人而極其至昔者帝堯知天之至故曰欽若昊天至我孔子知聖人之至又曰大哉堯之爲君於天而曰昊於堯而曰大哉可謂極其至矣自孔子沒惟孟軻氏知聖人之至故曰孔子之謂集大成自生民以來未有孔子厥後世君世主皆不能知漢平之封止曰褒成侯其後封鄒國公者有封隆道公者及唐元宗封文宣王宋眞宗於文宣王上加元聖二字後又改爲至聖其號略備然亦未足以盡聖人之德美至我聖元禮極隆備振耀古今此碑之不容於不刻也成宗皇帝制若曰孔子之道

垂憲萬世有國家者所當崇奉其言至矣盡矣武宗皇帝之踐祚也首祀先聖制曰先孔子而生者非孔子無以明後孔子而生者非孔子無以法於至聖之上特加大成切當之論極古未有文宗皇帝在位之四年制謂生知之出有開必先乃封先聖父母爲啓聖王夫人又謂閨門成教尙虛元嬾之封乃封夫人元官氏爲至聖文宣王夫人一家之內自上及下自外及內皆被寵榮有光萬年極前代所無又謂聖道之傳由其從嗣而明之而褒顏曾思孟爲復聖宗聖述聖亞聖封以上公亦前代所無歷聖之心可謂知聖人之至故能盡尊聖人之典其文當與天地日月相爲無窮然元竊伏思之創業垂統之君具高世之識不凡之見故能立一代令典爲後世取正恭惟我世祖聖德神功文武皇帝受命首重聖師春秋嚴釋奠之禮原廟隆祠祀之制開大學爲首善之地教胄子爲出治之原其在待王鶚也每見則賜之以坐呼狀元而不

名其在正位也禮命名儒許衡隆以師禮親之信之一時文化之盛遠過前代是又孫善繼善述之所自來也今皇上以天縱之姿尤用意文治人才彬彬克復至元之盛此當勒之金石爲萬世法程也涪之文廟舊爲一碑刻至元三十一年大德十一年詔文其餘封諡之碑未遑也守臣僧嘉閻至郡嘆爲缺典乃捐俸金采堅砥召匠掄才勒碑建亭命學正張安董其事丹雘華麗金碧輝映諸郡所無蓋臣子之心必誠必信又於亭之前爲小亭居叢桂之上扁曰天香亦致敬天之意亭道通泮池池之上又爲閣道通講堂堂正面有碑亦無日不致瞻仰之意先是庚寅秋公甫蒞政首創尊經閣次御碑亭後先相繼其餘學宮可謂詳且盡矣元草野布衣幸親見休光敢拜手稽首敬爲之記云

塗山碑記

楊升菴全蜀藝志文

賈元撰

華陽國志云渝郡塗山禹后家也古廟廢元至正壬辰郡守費著仍建廟嘗考娶於塗山之說一謂在此一謂在九江當塗東漢郡志云塗山在巴郡江州杜預考曰巴國也有塗山禹廟又古巴郡志云在縣東五千二百步岷山東折高七里周三十里酈道元水經注云江州塗山有夏禹廟塗后祠九江當塗亦有之杜預所謂巴國江州乃今重慶巴縣江州非九江之江州也漢史蜀志有稽至今洞曰塗洞村曰塗村灘曰遮夫石曰啓母復合帝王世紀蜀本志華陽國志元和志等書參考之禹乃汶山郡廣柔人其母有莘氏感星之異生於石紐廣柔隨改爲汶川石紐在茂州域隸石泉軍所生之地方百里夷人共營之不敢居牧靈異可謂畏禹爲蜀人生於蜀娶於蜀古今人情不大相遠導江之役往來必經過門不顧爲可憑信先是帝曾大父曰昌意爲黃帝次子娶塗山氏生帝顓頊顓頊生鯀鯀生帝帝之娶於蜀又有自來又謂蜀塗

山肇自人皇爲蜀君掌塗山之國亦一徵也至會諸侯於塗山當以九江郡者爲是東漢郡志云山在當塗杜穎一在壽春東北今有禹會村柳子有銘蘇子有詩且於天下稍向中會同於此宜矣通鑑外紀云禹娶塗山之女生子啓南巡狩會諸侯於塗山如是則娶生子生子而後南巡南巡而後會諸侯娶則在此會則在彼次第昭然會稽乃致羣臣之地或崩葬之所故有禹穴所謂塗山一曰棟山一曰防山紛紛不一太平乃晉成帝世當塗之民徙居於此故亦名其縣曰當塗好事者援此以爲說而實非塗山世次綿遠地名改易煩亂傳會不足徵况會稽塗山在禹時未入中國禹安得娶彼哉今特辨而正之庶祠廟之建得其本眞而禹后受享於誕生之地尤不可闕爾

三友巖

晏家場西二十里石壁有三友巖三大字未詳所出

金盤山龍洞記

元至正六年丙戌進士冉聰撰

金盤山石堂記

明戴錦撰

吾邑西北七十里有山曰金盤盤之下有洞焉龍潛其中洞口豁然狀如吐吸入數步有結石若雲懸若鐘二石立若危柱似經乎斧削者水由地行左折而東有石堂焉深三丈餘闕視深者減數尺堂之上有隙焉天光下燭仰視溜石之象若繪若塑若鐫刻然或伏或起或欹或正或伸縮飛潛而海島諸物萃焉堂之左水出成溪獲澗者無旱居民神其地而祠之前覆以廈歲不雨衆咸戾茲以禱焉先是頗穢褻頃復琢石肖以人形被以袞冕飾以金紫而稱曰龍王焉有禱卽應民益歸心故又上爲神龕下列臺案中列爐左右列棹凳皆鑿石爲之俾禱焉齋

長壽縣志 卷十四 金石
香燭致侑辭而以拜以跪者有瞻依或曰頭角爪介龍之形也肖以人而僭稱王焉可乎余曰噫龍神物也變態自出况敷大澤以活民而功豈在侯牧之下哉人而王之也固宜惜乎失靈久矣元至正始有碑而褒揚缺典有良牧至吾將述之而因以聞於天子姑記之以俟

通志外紀 萬歷時宮中火市有民婦遇一人求茗婦人出杯茗以飲之其人卽傾之於地婦怪之須臾宮中大雨火遂以熄其色皆茗也御柱上書四川長壽縣金盤山龍神赴京救火數字神宗大異焉敕封王號及歸至巫山與戴公綱菴同舟一夜風送輕舟遂至岳龍溪河公不知其爲龍也頃之與公別曰吾神龍也幸與公同舟共濟棋酒爲歡今無以爲贈有詩十二首按月分題倘遇某月旱卽以某詩相告當爲公雨後果應之如響

修建學宮記

王長德撰

當世有循良之望復數十年欲復未復之制以興教集縉紳諸士數十人不勸而勸之力以紓民其通達治體而宏濟時艱之盛業歟非風流大雅若廬陵眉山惠孚敏給若虞魯諸君子未易幾此也夫建學興教將盡斯民而教之非僅教士也而教自士始常觀泰象大來宮牆在望多士雲起峨冠矩步於其間而斯民悍鷙難馴之氣默化而歸於蕩平之軌逮乎攙搶頻仍曩之殿楹門廡巍然煥然者既已化爲頽垣廢址茂草豐杞矣子衿落落如晨星士氣益弱民氣益奮當事者恤其子遺又催科孔亟則民日親而士疏或稍假以顏色於是凌轢諸士無復顧忌挺而走險抑又何極然則修復之役又烏容緩哉昔創之今復之復者之功與創者等而復之於劫灰未散力絀難舉之時則功倍於創考古者辟雍鼓鐘以及甫柏徠松之締造未嘗不用民力也顧今昔殊勢

民力已竭非真能以綱紀教化爲己任經營重輕施有次第者其孰起而復之邑學宮久燼僅構一宇奉至聖先師春秋禮祀升降周旋於瓦礫之區草草威儀視爲具文耳賢侯黎公宰茲邑高懷明遠志若枯射仙人於江河之清盡濤滌陋習值伏莽未靖六師致討結繩斷絕於供億芻糗之暇議建學宮諸所闕者進薦紳諸士而告之曰學以興教非僅教士也而教自士始則修復亦自士始僉曰唯唯侯捐貲首倡諸紳士各以其力襄成擇人分任鳩工庀材徵運瓦石培砌頽圯凡所規畫悉出公指而櫺星石柱舊斷其右合衆力邪許而升續之猶有女媧煉補之奇於是戟門大成門左右兩廡啓聖祠同日告成上下翼拱觀者驚歎疑有神工陰來相之不知皆公崇德興學之精誠有以感之也當豎建之日公端服垂紳與諸紳士露坐達曙旌勤行賞之捐貲儲材爲魁星樓計胡床指顧意氣陶然曰教自士始吾將盡斯民而教之矣

是役也不徵民間一銖一粒不役一人匝旬竣事揮霍晏如持斯以往雖遺大投艱任天下之重而有餘豈僅一邑嗚呼世不見文治久矣所謂賢有司者精於刑名錢穀而略絃誦耳孰與夫洞識治源亟明治教經綸之才且不勞而事集者或公雖註吏議吾知行有賜環之召佐盛時以文化成天下日可俟也謹記

重修學宮記

李開先撰

康熙二十年王師除逆賊于白丈梁遺孽悉平我太守孫公於二十二年奉簡命來守重慶時值兵燹後學宮鞠爲茂草士鮮絃誦之聲民廢耕桑之業望正己帥之者惟賢太守是賴漢宣帝云百姓安其田里無愁嘆之聲者政平訟理也與我共此者其良二千石乎正此日之謂也會公至首以育德興行爲己任遂檄十七屬重新學宮

公捐俸以爲之倡月季則會課諸生爲之第其甲乙厚其旌賞以鼓勵之故甲子賢書元卷遂在渝屬而奏凱之數較昔倍加時村童野老方知學之爲益黨庠家塾間子夜書聲不輟於戲此果孰爲之而至是乎昔人有言向來一瓣香敬爲曾南豐則公之德化合屬可一日諉乎至於聽訟折獄明敏慈仁繫鮮寃民案無滯牘縉紳之子弟篤倚垂青城社之鼠狐不敢翫法杜少陵所謂天下得元結輩十餘公參錯爲邦伯萬物吐氣海內又安若公者其無媿矣考明萬曆時楚孝廉賀公諱逢聖爲廣文春秋禮祀甚虔邑宰夢先師遣子路享其祭宰驚異令左右伺之及祭先賢子路牌位果覆於盤迤之上明年己未賀公以榜眼及第官至宰相爲時名臣吾蜀亦有仕於楚者祭敬如賀後櫺星門柱內作鐘鼓聲子弟皆獲雋今者公命各屬於荒烟蔓草中復見宮牆富美俎豆馨香其誠敬更在昔賢之上先師必來格而錫以純嘏身居台輔

代襲公卿可不俟詹尹之卜而信必然者今王既告竣例應立碑以紀其事爰勒之石以昔賢之報爲公左券而又以今日之功爲後日司民牧者告焉謹記

重建靈驗碑記

明正德五年庚午廖應時撰

溪岸鏡壁

明崇禎時有僧名三學者卓錫渡舟場覺皇寺側溪岸上鐫虎溪雲深四字筆法超妙

三學和尚墓誌

周本一撰

和尚不知何許人卓錫覺皇寺仿廬山慧遠故跡題寺前虎溪三笑橋一時當道俱有額頌載在邑乘相傳爲明宦遁入空門者鼎革之際脩

長壽縣志 卷十四 九
然世外其志可欽故誌之

右墓誌爲邑增生張雨生書

重修啓聖祠記

王潛奇撰

昔舜以聖人之德居聖人之位橋牛以下之廟享歷千餘年而不墜而
夫子稱之曰大孝周公以聖人之德佐聖人之君建七廟立世室極乎
卜年卜世之久而夫子稱之曰達孝明乎孝子之心所以致於親者無
窮而追王上祀之典其重焉者也夫子生當周季雖攝相宗魯止屬大
夫之列有舜與公之德無舜與公之遇所以致孝於親者較之舜與公
不且莫然莫及哉然生知之出有開必先乃漢唐以來遵崇我夫子者
代有隆禮而未及於夫子之所生則於尊崇夫子之禮未備也元文宗
四年始封先聖父爲啓聖王先聖母爲啓聖夫人明世宗九年令兩京

國子監並天下學校各建啓聖祠以上丁日致祭是舜與公之孝夫子於千秋百世後始無遺恨也已我長邑學校建於明初毀於流寇迨國朝定鼎創修於太守孫公繼修於邑侯黎公皆未能復厥舊觀也前任石侯撫長五載悉心經畫擴其規模易其弊陋凡爲殿爲門爲廡俱如舊制教士有明倫之堂崇文有魁星之閣無不宏敞巍煥上下翼拱士之規行矩步於其間者庶幾復見宮墻之美富也獨啓聖一祠方營改建而侯適以避位去遂不果我賢侯薛父母甫下車謁聖見啓聖祠傾圮卽慨然曰學宮所欠者止此比於工一簣也前之人任其始余獨不能殫其終乎因與司教韓公司訓李公量其資費酌捐清俸率庠友黃珂王謨田宏通等十人爲之鳩工庀材徵瓦運石不數月而祠成翬飛矢棘制與廟稱韓李二公囑余記之余曰是役也能以夫子致孝之心爲心者也不傷財不勞民歷數公之經營至此而始爲完美是其所成

者大也昔明萬曆時楚孝廉逢聖賀公爲廣文禮祀甚虔夫子命子路
享其祭後公果以鼎甲爲名宰相則知夫子之神無乎不在感焉而無
乎不通也今我侯於祭祀時必虔必敬且推夫子致孝之心而致敬於
啓聖先師公異日身居台輔爲時名公卿可不以賀公之驗於前者爲
公卜于後哉是爲記

古寺摩壁

東林寺內有擘窠大書佛都二字明高僧三學筆跡也

不語灘鐫壁

邑東南十五里石壁上刻桓侯不語灘五大字爲乾隆二年趙鑄書

石刻古篆

圖經云白虎山石龕篆風月之臺四字甚古其上石崖桃花水出焉
有洞古邃幽深銀鴨石筍杳然仙境卽桃花洞今按桃花溪之第一

洞臺址猶存係六角惟崖屢崩石龕字跡已不可尋右銀鴨形堪髣髴左石筍大十餘圍高二十餘丈與崖上之桃源寨齊

羅山石鐫

羅圍大羅山石上胡超鐫墨莊二字

天台石刻

麟峯天台寨刻輝映天台四字亦胡超書筆力雄壯

古塔

八顛下廟側建古塔一座高三丈四圍八方有六丈有奇上刻物華

天寶人傑地靈八字巍然可觀

廟柱奇偉

八顛上廟文昌殿建石柱八四方四圓邑貢生江能運題聯云丹桂籍頻翻取土行全憑陰隲紫微垣拱坐錫科名豈在文章正中武聖

殿建石柱十均合抱中嵌石龍二隻躍躍欲飛四壁以石封頂漏明
福祿壽喜四字工程奇絕邑貢李蕃題聯云炎德冀重興偃月刀揮
手扶漢奸雄務盡掃臥蠶眉展氣吞吳寫作俱佳

鐵爐

八顆上廟正殿前供鐵爐一座高一丈鑄龍柱六上有鼎瓦鱗如繪
下三脚如虎立狀雕刻精緻清道光十四年首人項耀鳳監製

佛像莊嚴

八顆下廟豎石佛二十四尊殿前橫匾清乾隆七年歲進士甘如谷
題德沛蒼生四字筆力遒健

李寧一墓表

吳錫麒撰

錢唐人官祭酒

余既爲郡大夫李君銘其母之墓其明日復踵門請于余曰先君之葬

也適有寇警不克謁先生長者而銘之今吾母又主合葬非古之說而
以震撼其先人之體兆是懼遺命另營吉壤矣惟是先君之行不及誌
以納諸幽茲將代石以揭諸墓門之外則闡其隱而揚其光繫吾子是
賴因稽穎以行狀進余欲辭不能爲之表曰公姓李氏諱汝堂字光南
號寧一四川長壽縣人祖諱濱咸貢生以積學力行教其五子三中甲
乙科其雍正壬子副榜官安徽懷遠縣知縣諱鹽梅者卽君考也公幼
穎異日十行下時懷遠公爲西充學博以經義教授諸生習其傳者無
不速飛去公承過庭之訓日與同學相切磋業日以進中乾隆己卯科
舉人丙戌大挑以知縣用分山東旋仆旋起至甲午始補邱縣知縣蒞
任三月值王倫之變旁邑皆戒嚴邱縣逼近臨清人情洶洶公設方略
爲捍禦之備令邏者察四門嚴其啓閉而身以鎮靜之未幾王師告捷
一城雞犬無驚上官皆服其識旋丁懷遠公憂服闋後補臨邑縣知縣

在任六年除燒解紛不尙苛察然明于決獄訟小民壽張爲幻而應機立斷若神明然至于興起學校惠愛閭閻未嘗有煊赫名而思之者至今不忘至癸卯以母憂歸里適令子官浙江聲名日起公遂不復出與其配何恭人就養于舍嘗謂居官之道至要在節儉二字知節儉二字則不黷財不擾民上可以答朝廷下可以對百姓每諄諄以訓其子而子亦能奉而行之廚無大烹常饌不過鹽鼓鮮菜而已夫是以化行俗順而頌聲作矣以乾隆乙卯十月一日卒于台州府署年七十配何氏封恭人子一人名坦卽吾郡大夫也孫三人曾孫三人歸葬於本縣紫荊嶺嗚呼今之仕宦所以遺子孫者陸賈裝耳李衡木奴耳誰復知楊公清白哉而公獨能以節儉訓之略略數言與房孝冲之詔元齡者亦復何異宜乎清德之相承無替也今特書之以表其墓

古洞鏡壁

邑西七十里葛蘭鄉屬西山老龍寺山深林密洞古泉幽清道光九年已丑倉場總督戶工兩部侍郎邑人韓鼎晉題有仙洞雲寒古碣

塑像碑序

清乾隆三十四年己丑邑增生孫崇祖撰

培修五寶山大雄殿碑

邑人雷耳山撰

五峯嶺舊有寺觀曆久荒廢山僧本悟欲振宗風一時檀越咸鑒其誠捐資成美山右有純陽觀頂有玉皇觀極目達數百里岷江西來宛如玉帶諸山羅列蔚爲大觀

按五寶山在邑南三十里屬沱鄉屬與巴涪接壤據傳於唐代開山建廟嗣於道光二十九年改建大雄殿由雷耳山等請示董成旋於同治九年庚午并光緒十四年戊子迭次培修豎碑耳山撰文云

李滋然墓表并銘

安肅張蓋衡撰

先生姓李氏諱滋然字命三四川長壽縣人其先世自楚之麻城縣遷居縣治至先生凡十六世世以忠孝著稱六世祖秀春明世宗朝官御史抗疏劾大學士嚴嵩明史有傳八世祖士震官雲南嵩明知州與子長庚同殉難庚弟開先隱居著述累徵不仕著有讀易辨疑若干卷十世祖稚圭明季諸生被擄不屈死川東推忠孝必首稱李氏延至先生考曾白公以道光己酉舉人授黔江教諭髮逆僞翼王石達開竄入曾白公與都司譚健攬城固守援絕賦絕命詩朝服坐明倫堂自解所佩忠孝帶繫煖閣從容以殉賊入棄尸城濠閱四旬面色如生後乃殯殮方事亟時曾白公命其配左太夫人攜先生及姊星夜間道出避地酉陽門生家泊聞已殉節始扶櫬歸葬城北十里之王家岩事聞蒙賚卹

銀賞雲騎尉世職先生每念及先人死事狀未嘗不淚涔涔泣下七十年如一日也曾白公生先生晚鍾愛逾恆蒙養之教尤諄諄焉故先生自勝衣就傅庭授以經史使讀漢註兼治朱子小學樸學本源早基於此既遭兵禍稚弱熒熒慨念前徽益以衣德紹聞爲任而於古今學術源流漢宋師法寢饋既久識判遂精不拘泥夫一家之言淬勵淵微儼負時望數十年來角名場對大庭外膺民牧策名清時上匡祖德隱救時艱際萬流之淳滴衆說之朋興終克高潔自持卓然摺立獨行已志者蓋自幼已端厥本源故所成就益宏且正也年十九補博士弟子旋食餼累試輒冠其曹聚徒授經藉脩脯供菽水顧不規規於制舉文字遂浮沉名場者幾十稔會督部盱眙吳勤惠公徧阮文達省粵時親立學海堂意旨建尊經書院於成都聚通省高材誦讀其中光緒己卯南皮張文襄公督學蜀中拔識先生檄入院肄業因之所學益進於是

研精小學以求形聲文字之源而溯其微言大義凡井田學校禮樂兵
刑田賦選舉考工輿地天文靡不博聞強記而於曆代興衰之故與夫
賢奸忠孝之分尤能鑒其誠僞究其得失通之治世大綱其歸宿則必
取法先哲首重實踐蓋以漢學爲本宋學爲用溝通融貫採掇精華發
爲晚近通儒大師千秋之業非墨守穿鑿冥心坐照者可比也光緒戊
子以第六名舉於鄉己丑連捷成進士名在第四殿試三甲以知縣分
廣東卽用是年舉行恩科鄉試先生到粵己屆入闈監臨巡撫遊君智
開曾臬蜀夙重先生卽調入內簾充同考官主試爲貴筑李侍郎端棻
亦傾倒之於是歷辛卯癸巳甲午恩正四科皆同考得人稱感所取知
名士若新會梁啓超三水梁知鑑廣東駐防漢軍李家駒順德梁用弧
其尤著者前工部主事康祖詒今名有爲者固粵中新學宗盟又宣室
前席首承顧問之人也當祖詒甲午鄉試本房奇生文而弗敢薦先生

賞之加批幫薦乃獲售祖詒感之執弟子禮甚恭光緒二十二年遵旨
飭查新學偽經考一案以祖詒原著大旨尊崇孔子攻訐劉歆偽解於
經學源流授受師法反覆申辨曲極詳盡并非左袒惟祖詒師心自用
立言過當比之爲毛西河魏默深一流康氏賴以保全語在先生採薇
集中世之湛於經學者咸避之官粵十有五年先後補署電白文昌曲
江揭揚普寧東莞順德諸縣移牧德慶州未到任宰電白六年爲最久
曲江揭揚順德各一年皆有仁政民懷吏畏不讓古人光緒末葉以辦
學遭大府駁詰侃侃直陳語侵督部奏劾去官解組之日蕭然儒素先
生之爲牧令也凡下車之始輒榜通衢并樹木堂下不取民一錢誓眞
誠與民相見有乾嘉朝陳鵬年汪輝祖劉衡劉棨之遺風方其宰電白
也有兩族爭墳山訟幾百年不解其一呈契署順治朝年月日先生批
曰偽契蓋電白隸版圖爲康熙間非順治朝也訟遂寢紳民頌之大府

稱之宰相必用讀書人牧令亦然先生治庶獄矜慎對兩造絮絮作家
人語手批口判案無留牘辦理教案尤能持平曲江任內判結民教証
案尤多揭揚治匪綦嚴有旨嘉獎然每蒞治所培植士類振拔單寒風
氣爲之一變暇則巡行四野敦勸農桑此先生服官之大較也時項城
督北洋以書趣先生北上將禮而羅之幕中獨婉辭弗就知其弗克終
持臣節也旋以門人李家駒出使日本奏以先生同行因得訪日本諸
佚書遂補成曾白公公正舊註考證刊刻行世自著書四種曰周禮古
學攷十一卷朱子集註古義箋六卷羣經綱紀考十六卷四庫全書目
考四卷歸國保縣丞會冲皇嗣位典學方殷先生於宣統三年七月走
京師以所著書進呈奉旨授學部七品小京官旋給主事銜將以先生
充師保之任乃是年十月二十五日奉孝定景皇后懿旨類允兆庶祈
請改制共和冲皇退位深宮初武漢事起天下騷然中原鼎沸京師風

鶴日警窮蹙不能居乃南走上海除夕在滬讀退位詔有詩恫之壬子
元旦成申江感事詩今皆存集中秋草含元感憤有作哀音變徵不計
聲律其年春小泊揚州至梅花嶺史忠正公墓於是泝長江至金陵過
武昌陞夔萬而歸隱居不出自號采薇僧廬曾白公墓下凡九年日食
粗糲若將終身每至十二月二十五日必北向哭終日僅食白粥一盂
晨夕至曾白公墓焚香展拜墓前石磴凡六十餘級雖扶掖必躬行祈
寒暑兩疾風霰雪無間也丁巳復辟十日民軍重建共和訛言取銷優
待條件先生聞之亟馳書門人梁啓超力言是舉非出清廷意極請始
終維護洒洒數千言辭婉而旨哀後得梁復書允爲保全先生之心乃
安庚申夏復自言終當重往神京一覲舊君秋初卽襆被以出至易州
謁崇陵周覽寶城碑樓隆恩殿布衣草履往返數里無倦容遺臣血淚
浪浪襟袖至不能止冬十月進呈廬中所撰明夷待訪錄糾繆一卷陳

太保寶琛奉詔賚賜御書正學匡時扁額及二品冠服卽今年元旦朝
正朔萬壽節隨班祝嘏盞衡所目擊者是也既出語人曰吾事畢矣爲
七言絕句八章贈舊友二月二十四日遷居南橫街子夜忽召家人曰
吾今夜必去告其婿胡炳堃曰吾無遺恨身後事則有壬子遺囑在培
業來汝得語遵吾治命行旋起坐命紙筆自草遺疏甫十二字疾弗克
支遂絕筆辰正含笑端坐逝矣時辛酉二月二十五日距生於道光丁
未年三月初六壽七十有五綜計生平承忠孝世家之遺澤幼邁咸同
東南之難不幸孤露稍長而劬於學惇惇面面陶冶羣言自鄭許入手
以端其基歷治訓故考據掌故詞章放之極於經世之學溯其淵源方
之閻若璩戴震惠士奇諸先儒無多讓焉推之程朱以闡其理而盡其
用則又陸桴亭陳確菴之選也特以忠裔遺孤志氣卓越又與李二曲
孫夏峯諸子爲近遭遇時變不期而同先生之志哀矣先生配董夫人

先年妾二周氏江氏有篤志曾刲臂療先生疾子二長培申次培業俱
董出女六長至四董出五六周出孫六光旬光源光宗光圻培申出光
晉光盞培業出曾孫一裕基光旬出長女字同里楊文琳未婚壻死女
過門守貞奉孀姑祧幼侄三歲子殤其母董又卒女乃投繯以殉光緒
朝旌表如例培業邑庠生留學日本法政畢業廷試舉人曆任審判廳
推事分省縣知事盞衡弁陋曆任檢校法部鈎稽統計垂十五年鼎革
後徒以嚴親八秩繼慈望七不得已鬻文爲活勉娛二老以視先生之
道德學術經濟文章甯弗退阻旣哀先生行自哀也雖然銘幽泐氓後
死之責以先生將卜吉塋祖墓之原乃敬系以銘銘曰循吏傳人耶儒
林傳人耶湯斌陸隴其以後先生何不幸以忠孝持文物之終耶丹岩
截業烏冲紆蟠玄扃永闕貞魄斯安千齡億代式此觥觥儒者忠孝之

阡

鍾正品墓誌銘

彭光遠撰

公諱正品號錫三蜀東長壽人也祖本元由湖北黃安貿易入蜀娶金氏遂家於長父瑞圖清勤質實鄉里稱善人焉娶周氏生四子長獻廷次玉齋及公與弟子卿家赤貧二兄皆析居親老弟幼相對壁立形影淒涼公年方十餘歲憤發窮途習計然術得一錢輒以奉堂上甘旨清咸豐初乃業鹺由自流井販運售楚客宜昌沙市者動經數年忠實老誠爲商界所推重於是家漸起置產數百畝弟子卿渾厚精明頗資臂助然而創業者公也公不自以爲功田產悉均分之凡事忍讓終身無間言所尤難者公七姊幼字劉未成禮而劉遽殞姊學嬰兒不嫁撒環瑱以養父母持齋誦經寸心千古有司表奏貞孝公率妻事姊如母事無巨細必稟命而行曲意承歡曆數十年如一日姊沒時公年已六旬

餘矣哀毀骨立旁觀者爲之感泣公性仁慈而慷慨好義親友告貸略無吝色曾禮文人有貧乏者助之膏火至今士林稱道弗衰晚年家居足跡不入城市每日觀書寫字而外飲酒數杯陶然自得弟子卿援例晉司馬銜馳封公奉政大夫光緒二十四年戊戌歲正月初一日以疾卒於家享年六十六歲娶周氏續娶余氏女三無子以弟之子端笏繼能讀書英年入泮孫二公初葬紅岩口之西原嗣因墓地受水另選吉穴光緒二十七年辛丑歲十月二十三日遷戴家壩楊家堡與弟子卿合葬午山子向此地羣山環拱局勢軒爽堪輿家稱爲磊山正結靈氣所鐘云銘曰

周有弦高漢有王烈商賈之中類多賢哲公遊闈闈勝親文墨孝根於心義形於色黃土一抔種福種德貞珉易磨眞性難滅

鐘母袁孺人墓表

彭光遠撰

孺人袁氏鐘公錫三造室也性剛家人稍拂其意輒怒不可解然事公極謹起居飲食幾幾乎視無形聽無聲公疾篤孺人泣曰妾受公厚恩誓當及殉殯孺人躍入池中家人疾救得甦孺子端笏再三婉勸率妻子曲意承歡孺人曰我雖無出然汝等待我無異親生復何恨但心已死斷難挽回耳於是陰市毒藥藏篋中端笏偵獲密易之囑老婢晝夜提防將葬孺人服藥無效痛哭終宵次日復破啼爲笑代理一切事家人睹此情狀付其求死不得或有轉心會葬人多舉家匆遽偶不及防孺人潛於別室自縊端笏感其義乃附葬於公塋之右嗚呼公生平最重知己卽婦人女子亦甘爲公死豈不奇哉

東嶽廟碑

彭光遠撰

長邑東嶽廟典依經訓歆馨祀太皞之神代著威靈陰隲悚下民之志

乃風霜剝蝕棟宇傾頽塵封榻而蝙蝠爭飛苔上階而鼯鼠亂竄鬼將

求食誰窺海碣之庭神欲依人難寄司空之宅子岑周先生釀金為會

集腋成裘舊址重恢新模特煥丹甍澄光之地畢院森嚴銅關石榜之

門黑城恍惚窮形盡相如技吳道子之圖吳道子畫也嶽變相兩市屠沽不售觸目驚心似鑄

夏禹王之鼎或謂東嶽者封禪禪書升中備禮七十二君之跡望若登

仙一千餘字之銘語非志怪今乃指名山為地府奉天孫若鬼博物志東嶽為

天帝孫似增附會之疑難解荒唐之誚不知死生有命梁甫參亢父之權遁

開山圖云亢父知生梁甫知死修短由天玉策探金篋之祕魯鄆風俗通東嶽有金篋玉策考知人壽之長短漢武帝登封探得十八倒云八十散後果

然鮑照則篇傳松柏限迫難寬鮑照松柏篇龜輪安可獲岱宗限已迫璩則年在桑榆期疑預

定應璩百一詩年命在桑榆東嶽與我期劉楨恨故人之不見劉楨詩常恐遊岱宗不得見故人管輅恐治鬼之太煩

管輅謂其弟辰曰但恐至泰山治鬼不得治生人司黑籍而共仰靈威尚書緯解青帝為靈威仰鎮青方而主召魂魄張華

云東嶽主召人魂魄杜光庭洞天記以爲鬼神之神
齊舉凡長人士伯爛七雷淵之變相悉以屬之

夫固於今爲烈振古如茲矣或又謂

青天白日何處尋紂絕秦煞之宮億貌千形豈盡隸金字紫函之籍然
則奇奇怪怪渺渺冥冥六道輪迴皆屬想當然之事兩廊地獄其在亡
何有之鄉乎不知陽曰神陰曰鬼六經無不語之條生爲英死爲靈千
古有難磨之氣蜀稱天獄縣號酆都修文豔說卜商判官親逢張謂包
公正直黃泉阻關節之通擒虎威嚴白晝驚閻羅之夢桓彝則城隍受
命子文則土地膺封三代以還恆多因果九原而下別有洞天冥報非
虛庶幾寒奸雄之膽神道設教所以救王法之窮或又謂報施顛倒美
惡混淆吞舟多漏網之魚焚林有羅羅之雉勢赫而神甘退聽時衰而
鬼說挪揄似天道之無憑阻人心之好善不知通塞者命也早遲者時
也或蒙祖宗之恩或食子孫之報遭逢有待不防老其材而用之氣燄
方張必將厚其毒以罰之究之陽誅易道陰律維嚴巨蠹神姦伏死後

難逃之罪忠臣孝子雪生前不白之冤冥漠有靈鑒觀不爽分功過於
地下補缺陷於人間此則無鬼之論可以刪而反恨之賦無庸作也或
又謂天地之德首重好生釋老之家亦須戒殺而乃人憐焦種獄號寒
冰畫變相於九幽聚游魂於萬劫雖按律定罪三代猶有肉刑而苛政
深文十王豈皆屠伯不知面原鐵鑄絕少私恩目似電光最嚴陰惡彼
膠庠蹈躑躅之行衣冠懷禽獸之心較魍魅而更姦投豺虎而不食非
刀山劍樹何以殲鬼域之魂必火宅銅圍始足褫梟雄之魄至若善男
信女義士仁人則覺路宏開法輪易轉信三生之慧業善果宜培倘一
念之皈依罪花便落落蓋報應雖慘將化凶頑爲肖子順孫而賞罰維公
反覺幽冥有堯天舜日矣今日者簷鈴金奏龕火珠搖幻非海市蜃樓
洵有冥籤鬼錄試想猙獰之狀懣悔應遲恍聞呵遣之聲夢魂俱悚君
子固視嚴十日小人亦訴凜三尸義主勸懲且續搜神之記事關風化

休懸罵鬼之書從此月朗化城雲開壽域風雨避灌壇之令

博物志泰山神女嫁於西海神

童欲東歸必有風雨太公為灌壇令畏其德不敢過哭於路文王乃召太公還

農慶豐年與馬聯段暉之交

魏魯段承根父暉師事歐陽有一童子同學二

年辭歸從暉請馬暉戲作本馬與之童子曰吾泰山府君子奉敕遊學言訖乘風而去

士爭奮學馨香共禱疵厲潛消凡神靈

默佑之功皆先生經營之力是役也輸棗梨之錢者麇至

漢武帝封泰山命羣臣輸棗梨錢

効壤土之助者晷趨經始於某年月日落成於某年月日功德無邊勝

造頭陀之寺姓名不朽請鑄皇甫之碑

重修石佛寺記

甕安閱永濂撰

城南郭石佛寺因石造佛像多尊縣志未詳創修年代傳聞自昔頗著

暨異清中葉有石某誠求如願乃捐募鉅金復興廟貌香火由是甚盛

及於民初縣中創修公園即撤廟之木石以為亭臺山門兩廡既撤矣

折及正殿而工人自簷際跌下受重傷乃已由是佛像露立住持星散

正殿諸佛像亦被闖提毀壞迨盡民國廿年春余來守是邦每經其地見諸佛巋然露立傷衆生之迷誤痛佛法之淪夷竊欲修復以維大法顧民力凋敝未可率舉正籌措無方適因案得錢金若干法院張院部鑑邵檢察官一秋籌助若干諸仁者又捐金若干乃委救濟院長向榮甫君董督興事自五月鳩工迄於十二月始成先是殿爲北向余度其山川形勢改爲西向大江在望羣山環拱是不僅廟貌煥然而山川氣象亦爲一新焉正殿爲閣曰大願左則因舊殿爲念佛堂右則新建一樓下作寮房上陳經籍凡諸佛菩薩像共五十六尊皆一一新之像多石造且極莊嚴故寺名仍其舊焉下則重建山門走廊門外商由李教育局長元鈞捐街地一幅以備栽植樹木而爲蔭翼當其創議時有竊謂修葺佛寺乃不急之務邑宰初來當爲地方謀利益顧亟亟此無益之舉無乃輕重倒置而大背民望乎余以事未成無足與辯今者廟貌

既成矣不能不爲一言以釋羣疑以啓正見夫佛者覺也自覺覺他覺行圓滿方名爲佛乃煩惑淨盡福慧俱足二死永亡三德圓證之嘉號實爲聖中之聖天中之天故列子仲尼篇曰西方之人有聖者焉不治而不亂不言而自信不化而自行蕩蕩乎民無能名焉佛所立之法有世間出世間二種世間法全同儒教而於倫常能盡誼盡分與否各皆示其現因後果令人持五戒修十善庶可人各敦倫盡分閑邪存誠諸惡莫作衆善奉行而爲賢人善人矣出世間法則修我定慧斷貪瞋癡明心見性證菩提道與信願念佛求生西方仗佛慈力了生脫死矣出世間法亦以世間法爲根本世間法亦須兼修出世間法故得三根普被無有一人不蒙其澤也在昔闢佛之最著者爲韓歐程朱張李韓歐完全不知佛教中事程朱等則竊讀佛經取其意義以自雄後之理學莫不皆然讀聖學宗傳便可悉知又爲掩耳盜鈴之闢駁者一則恐後人皆學佛或

致儒門冷落一則企已身後得醇儒之名與入文廟之實遂致陽奉陰違也然以破斥三世因果六道輪迴之故俾善無以勸惡無以懲及至世風日漓梟獍橫行或有弑父殺母罹於重罪嚮使儒者咸皆提倡因果輪迴誰敢作此大逆以自取長劫在無間地獄受種種燒煮屠割等苦耶是知欲儒教之振興尤當以佛法爲輔弼如兩輪並運雙翼齊張彼此均各有益矣間嘗論之孔子立世法之準則佛則創出世法之極軌世儒不知徒逞門戶之見匪惟無損於佛適自彰其淺陋而已自僧制變遷出家者或以患難或以饑寒其果誠心求了生死者不過十之二三而又鮮善知識常爲訓導致成啞羊飯袋爲我佛之罪人者蓋亦不少謗佛者卽藉爲口實謂此輩不織而衣不耕而食旣無修持以利己又無道德以利人徒爲社會之惰民不惟無益而又害之不知岷山出玉不能徧山皆玉以石見玉而欲措之烈火則玉石俱焚誰爲續佛

慧命繼往開來之人乎故僧與佛法同爲三寶議者因少數敗類而非及佛法無乃過於偏執乎卽以儒言冠儒冠而服儒服自命爲儒而蛇蠍其心禽獸其行者世豈乏人而獨於僧人卽以諸佛菩薩是責是望寧不過刻且稽諸今古其勤行精進自行化他達通響化善信崇拜者高僧傳中詎少其人今以謗佛之故而漫然概括之豈平情之論哉試往各處佛學機關詢之其提倡人多是從前毀謗破滅之人後以閱曆既深方知前人之誤已也遂極力提倡以期自利利他耳不佞亦是其一幸一間未泯猛識前非更恐後來者狃於徧執沉迷不反故不惜因事敷陳藉資補過又見世風日下邪說橫行人心陷溺不可收拾爰就已毀之寺而重新之俾見聞者同興有感同種佛因同登覺路所願以此功德令從前建修葺者近來提議毀除者現在出語提倡者出貲贊助者出思規劃者出力造作者并一切見聞或毀謗或讚歎者悉皆銷

除無始惡孽增長最勝善根凡過去者并及現在諸人各各過去父母
宗親悉皆神超淨域孽謝塵勞蓮開九品之花佛授一生之記凡現在
者所有一切眷屬悉皆孽障冰消吉祥雲集膺箕疇之五福納伊訓之
百祥又願雨暘時若穀麥豐登干戈永息疫癘潛消俗美風淳追唐虞
之盛世民康物阜頌天下之太平四恩總報三有齊資法界衆生同圓
種智

陳燮殉難紀念碑

譚麟 字羣逸 撰

陳烈士燮字調元四川長壽人也由縣立高小畢業升入重慶聯中值
民國八九年間日本據我青島烈士憤甚誓以身報國提倡抵制日貨
不遺餘力十二年入京升學王大深知欲救中國非實行三民主義不
可乃投身中國國民黨慨然以繼承中山未竟之志自任十五年大沽

口事件發生八國自出無理通牒烈士以政府孱弱無力非人民起而
監督難圖勝利三月十八日北京民衆在天安門開國民大會烈士邀
集同志前往參加繼偕同人至國務院請願殊執政早具殺人之決心
當命衛隊開槍轟擊烈士不幸中彈殞焉夫衛國捐軀固烈士之素志
所可惜者不死於捍禦外侮而被殺於國賊良可慨也邑人聞耗開會
追悼并議豎碑紀事以昭義烈惟以政局靡定未遑表彰今幸北伐成
功國民政府已准烈士公墓於北平圓明園年給卹金四百元足徵國
家之公理猶存卽烈士之英魂未泯爰勒於石以勵後來

黃節母但孺人碑

韓光碧撰

苦節黃母但孺人年十九夫子代榮公歿孺人卽矢柏舟志手摩其半
歲遺孤曰未亡人所以不及相從地下者以有此耳如或纖芥生死生

以之孺人房居二長三兩房始而欲易其志不可又欲害其孤孺人百計防閑居處一樓備白梃自衛溫飽不計者十餘年孤成立後名啓林孫曾漸有發祥朕兆共奉節母以五世同堂終視彼欲害其孤者相去遠矣孺人之曾孫本善性好佛七十餘矍鑠猶存家稱富有本善兄本源之孫號樹聲者又以詩書通品見重士林選任團務及縣議員職苦節之後多達人吾知其方興未艾也癸亥秋余避亂鳳城樹聲時相過從以節母碑文爲請余既重樹聲之賢而次子文鼎又本善孫婿義不容辭爰爲之文曰

羅圍之巔石質貞堅世毓懿德維母尤賢撫孤葆節備極迍邐登樓自衛寒暑十年上瞻北斗下誓清泉嬰懷白志天補海填宏茲燕翼利就名全芳心勁節鏡後章前至今烈蹟閣境爭傳如瞻陟降風雨長天巨靈所擘山勢嶄然千尋萬仞稱此名鑄

長壽縣志 卷十四 金石
賜書樓紀念碑

韓鼎普撰

嘉慶九年二月三日仁忠睿皇帝臨幸翰林院賜晏賡吟臣時官翰林

蒙恩分賜御製味餘詩集杜詩集註并絹綺茶硯諸珍洵藝林曠典敬

建斯樓尊藏御書永昭聖澤臣曷勝沾仰之至道光三年歲次癸未八

月十七日臣韓鼎普敬立